

Nai' Paulus in surat ansoun ee neu apirsait ein kota Roma

Saloom

¹ Surat re' ia na'ko au, nai' Paulus kau. Uisneno npiir naan kau 'jair Yesus Kristus In haef. Rarit In nait kau 'jair Kristus In aan renu' ma aan reka' he 'nao utoon a'bi mee-mee anmatoom nok In Rais Reko.

²⁻³ Un-unu' te, Uisneno n'ator nain he In mafefa kniun' ein antuin anmatoom nok Rais Reko anbi In Suur Akninu'. Anbi Surat naan, Uisneno anba'an he nsonu' In Anah, Nai' Yesus, he njair mansian. Oras ia, In rais manba'an naan anjari nrair, natuin Nai' Yesus neem anrair anjair mansian, re' na'ko usif nai' Daut in sufan. ⁴ Anbi rasi bian, Uisneno nakrira' bukti mnak, Yesus Kristus, In Aanh aa kuun amsa'. Fin Nai' Yesus In Asmanan, kninu' batuur-batuur, huma' mese' on re' Uisneno. Ma Uisneno npaek In kuasa he namonib nafani' Nai' Yesus na'ko In a'maten. Na'ko rasi naan, hit tahiin tak, Uisneno In Anah naan, es re' Nai' Yesus, hit Usi'.

⁵ Nai' Yesus nakrira' In nekan arekot neu kau, fin In npiir ma nbetis naan kau 'jair In haef, he utoon In rais manba'an a'bi mee-mee. Fin In nroim he tuaf-tuaf re' ka atoin Yahudis fa msa', anpirsai Je, ma nmoin natuin In romin. Au 'romi msa' he uuf-uuf ma pah-pah anpirsain neun Kristus, ma nmonin natuin In romin.

⁶ On naan amsa', hi abit kota Roma. Hi mneem ein mi'ko pah ma uuf amfaun ambi bare-bare. Yesus Kristus anpiir naan ki mnak, "Iim nai! Iim he mjair Au ngguin!" ⁷ Etun au 'sonu' surat ia 'eu ki, hi abit Roma, ma umnaub ki m'ak, Uisneno anneek ki. In ntoit ki msa' he hi mjair Iin na re' ammoni kninu'.

Au 'onen he hit Ama' Uisneno, ma hit Usi' Yesus Kristus, nakrira' Sin nekak arekot, ma nfee ki mamut, rame' es nok es, ma tainina'.

Nai' Paulus an'onen ma nteek in partei ngguin

⁸ Nahunu te, au 'toit makasi kou'-ko'u 'eu Uisneno, natuin Yesus Kristus anmeup et hi neekm ein. Au 'toit makasi msa', natuin tuaf-tuaf re' natuan nbin bare-bare nbin prenat pah Roma in naan ee ok-oke', na'uab ein anmatoom nok hi rais pirsait meu Nai' Yesus.

⁹ Au 'onen piut-piut ma 'teek ki. Batuur! Uisneno neikn On nahini mnak, saa' re' au u'uab ee re' ia, ro batuur! In nahini msa', au 'meup nok nenuf ma'tani', he utoon Rais Reko na'ko Uisneno In Anah. ¹⁰ Ansuun oras au 'onen, au 'toit 'ak on nai: “Uisneno, au tuak ii kuuk ka uhiin fa in raan ii on mee. Mes karu natuin Uisneno Ho romim, mfei ranan he au 'nao 'kuis au partei ngguin etan kota Roma.”

¹¹ Au 'onen on naan, natuin au umnau ki he 'iit 'aan ki, he au bisa 'bait 'eu ki kuasa na'ko Uisneno In Asmanan, he hi mjair Uisneno Iin na, re' naran ma ntahan ma'tani'.

¹² Au sairt ii on nai: karu au 'jair he 'uum ma utua 'ok ki, au he 'ha'tain ki, he hi neek pirsait naan nakii' naheer anteni'. Ma au 'roim he hi mha'tain au neek ii msa'.

¹³ Aok-bian manekat arki! Au 'roim he hi mihini mmak, fani-fani au sairt ii he 'eiti' 'makius ki 'bi kota Roma naan. Mes antea oras ia, ka bisa fa fe'. Karu au 'jair he 'uum, au ufnekan ma 'harap anmui' tuaf amfaun anpirsai ma'tani' neun Kristus fe', on re' anbi bare bian sin. Nok ranan naan, au 'meupk aan napein in afan arekot.☆

¹⁴⁻¹⁵ Maski on mee msa', au 'naben ate au ro he utoon Uisneno In Rais Reko 'eu sekau-sekau goah. 'Eu tuaf apaek a'uab Yunani, ai' 'eu atoin jintiu ai' afuat anbi rais pirsait amnaa' re' anpaken uab bian sin, ai' 'eu a'naet ein, a'baut ein, ai' askorat sin, ai' ka askorat fa msa'. Es naan ate, au ubarab a'rair he 'eit 'eu kota Roma, he 'makius 'aan ki.

☆ 1:13 Haef ein sin Reta' 19:21

Uisneno In Rais Reko, anmui' kuasa he nsoi nafetin mansian ein ok-oke'

¹⁶ Au ka umaeb ok fa kre'o msa' anmatoom nok Usif Yesus In Rais Reko. Fin karu nmui' tuaf re' anpirsai Uisneno, Rasi naan anmui' kuasa na'ko Uisneno he nsoi nafetin tuaf naan na'ko in sanat ma penu sin. Atoin Yahudis sin nahiin rasi ia nahun-hunun, rarit na' uuf ma pah bian.☆ ¹⁷ Rasi naan nakrira' Uisneno In ranan he nareko' tuaf asanat amsa'. Rasin re' naan bisa njarin, asar tuaf anpirsai Je. Fin matu'i et Uisneno In Suur Akininu' mnak,

“Tuaf ro he npirsai Uisneno fe',

na' sin bisa narekon ma nmarama' nok Ne.

Fin karu sin nmonin ma npirsai Je,

na' sin napeenin 'monit amneot ma ammonot.”☆

Uisneno natoon neu tuaf re' ka nroim fa he nahiin Je

¹⁸ Mes Uisneno natoon anrair nak on nai: anmui' tuaf re' ka nrae natuin Ee fa. Ma bian anmo'en rais maufinu huma'-huma'. Mes Uisneno ka ntoup fa sin a'moe'k ein naan. Anbi sin nekak naank ein, sin nahini nrarin saa'-saa' es re' batuur. Maski on naan amsa', mes sin nmo'en rais amre'ut piut-piut sin. Sin nfuri' tuaf-tuaf sin, onaim tuaf-tuaf ein naan ka nahini ntein' ein fa, mee es re' batuur. Etun Uisneno he nasanut hukun neu sin na'ko neon goe tunan. ¹⁹⁻²⁰ Tuaf-tuaf ein re' ia, ka napeenin fa rasi 'sukif he namneob ok, fin rasin re' tuaf bisa nahiin anmatoom nok Uisneno naan, naan mahini' ma nakninu' nrair. Natuin In neikn On es re' nakrira' sin! Au sairt ii on nai: anmurai na'ko oras In nmoe' neno tunan ma pah-pinan antea oras ia, karu anmui' tuaf he nahiin rasi anmatoom nok Uisneno In tuan ma In kuasan re' ka natfeek fa, bisa! Maski Uisneno In tuan naan ka mamnita' fa, mes hit mansian ii bisa tahiin Je fe', nanete npeo' saa' re' In nmoe' sin.

☆ 1:16 Nai' Markus 8:38 ☆ 1:17 Nai' Habakuk 2:4

Etun au 'ak, amaufiunt ein ka napenin fa rasi 'sukif he namneob sin tuak ein antein am nak, “Au ka uhiin fa saa'-saa' anmatoom nok Uisneno.”

²¹ Onaim maski sin nahinin anmatoom nok Uisneno, mes sin ka nromin fa he nmanauk Ee mnak, “Uisneno naan, hit Uisneno!” Sin ka nromin fa msa', he ntotin makasi neu Ne. Rarit sin teenb ein antaisibun, tar antea sin ka nahinin fa saa'-saa' antein re' batuur. Sin ntaka'-naan ein, ma na'uab ein rais poi huma'-huma' anmatoom nok Uisneno In tuan. Ma sin neek ein nameis'okan.✠

²² Sin es-es ate naiks ok am nak, “Au re' ia, tuaf re' nahiin rasi mfaun!” Maski sin nateenb ein on naan, mes batuur ii, sin re' naan, anmonon on re' ukum. ²³ Rarit sin ka na'besan fa neun Uisneno re' ma'tain re'uf naan, fin sin nak, “Hai ka mperluu fa Uisneno on re' naan!” Mes sin nmurai na'besan neun faut maruna' huma'-huma', on re' mansian. Rarit sin na'besan neun faut maruna' on re' koro, ma on re' mu'it bian, tar antea on re' kaun ein amsa'. Nok ranan naan, sin ntorak Uisneno re' ka bisa nmaet fa, ma nseun Ee nok bare 'maten!✠

²⁴ Etun Uisneno nafetin ma nkonan sin on re' naan, he sin nmo'en natuin sin roimk ein kuuk. In nkonan sin he nmo'en rais maufinu re' na'uu ma na'baa' et sin neek ein. Tar antea sin ka namaeb ok fa ntein. Rarit sin n'oemetab sin aok ein huma'-huma', ma sin anmamo'en on naan neu tuaf bian sin aok ein. ²⁵ Anbi sin nekak naank ein, sin nahini nrarin noni' re' batuur anmatoom nok Uisneno, mes sin ka ntae natuin ein fa. Sin teenb ein namre'un nrarin, rarit sin nateenb ein am nak, “Reko nneis, maski hit tmoe' huma'-huma' tar antea tamre'u tmate msa', ka nmui' fa resiko saa'-saa'!” Sin na'besan neun baer' ein re' Uisneno nmoe' sin, mes sin ka nromin fa he na'besan neun Uisneno re' anmoe' baer' ein naan! Sin nmoe' sin tuak ein on re' atoin ahinit ma amanoet anbin rais pirsait, te kaah, ruman, ka ma'upan ma ma'osa' fa.

✠ 1:21 Efesus 4:17-18 ✠ 1:23 Surat re' Nareta' Nafani' Raan A'honis 4:16-18

Fin re' batuurn ii, hit arkit mansian kit, ro he tpures ma taikas, ma thormaat teu Uisneno piut-piut! Naan es re' ma'osa' ma ma'upa'!

²⁶ Natuin sin maufiunk ein re' naan, etun Uisneno nafetin ma nkonan sin he sin nmo'en rais re'uf natuin sin roimk ein kuuk. Rarit sin na'haek ein tafi'-tafi', ma ka namaeb ok nahinin fa. Sin feek ein ka nromin fa he ntupan nok sin moenk ein anteni', mes sin nromin neu saa' re' ka on fa re' biasa. Fin bifee ji antuup nok bifee!

²⁷ Atoin ein anmo'en on naan amsa'! Sin ka nromin fa he ntupan nok sin feek ein antein! Mes sin ntupan nok atoni'! Sin ka namaeb ok fa kre'o msa'. Etun sin napenin hukun natai nok sin sanat! Fin sin ntebin ma nbeon na'kon ranan re' amneot ma ammonot.

²⁸ Sin nateenb ein nak, "Reko nneis, kais ta'kii' itbi Uisneno." Etun Uisneno nafetin ma nkonan sin on re' naan, he sin nmo'en natuin sin roimk ein kuuk! Onaim sin suma nateenb ein rais amre'ut annees jah! Rarit sin nmo'en kuuk 'moe' ruum-ruum!

²⁹ Sin i'moink ein naheun nok rais maufinu huma'-huma'. Sin ka nmoe' nahinin fa rais reko, mes suma nmoe' nahinin rais maufinu ma amre'ut annees. Sin nakoman. Sin natuun ein tenab amre'ut. Sin amantiuns ein. Sin nroron mansian. Sin amatoes ein. Sin aputa-kriut ein. Sin apoit ein. Sin afeef akreot ein. ³⁰ Sin nromin he na'uab na're'uf es in kanan. Sin nsaken Uisneno. Sin ka nahiin fa harat. Sin nkana'paar biak ein. Sin na'naeb sin tuak ein. Sin namin tenab amre'ut huma'-huma'. Sin nromin he nraban mahoint ein. ³¹ Sin ka natniin fa saa' re' batuurn. Sin ntanhai kuuk sin rais manba'an, tar antea atoni' ka npirsai sin fa ntein. Sin ka nneek fa sin aok-biak ein. Sin ka nmu'in fa rais kasian akre'o msa'.

³² Sin nahini nrair Uisneno In atoran re' nak, tuaf re' anmoe' maufinu on re' sin, tebes namneo, sin ro he napenin hukun a'maten. Maski sin nahini nrair atoran naan, mes sin nmo'en rais maufinu ruum-ruum piut. Sin

anfuri' tuaf bian he nmo'en maufinu on naan amsa'! Naan ro bainesi'!

2

Uisneno natoos' msa' neu atoin Yahudis re' In npiir naan sin

¹ Ho mneen amrair rais maufinun fe'e na. Rarit of oni' ho mutenab am mak, "Airoo! Atoin ein sin maufinu bainesi'!" Karu ho mutenab on naan ate, ampaant om, oo! Fin ho maufinu on naan amsa'. Etun ho ka mmui' fa rasi 'sukif he mumneob om, mak ho re' naan, sekau. Karu ho mak, biak ein anmaufinun, onaim sin ro he naperin hukun, kais amnikan mak, naan ho muroib sanat meu ho tuam aan kuum. Fin ho ammaufiun on naan amsa'! ☆

² Mes hit tahiin, karu Uisneno anfee hukun neu tuaf re' anmoe' rais maufiun ein, ro tebes In nafeek sin rasin naan, natai ma namnoon. ³ Ai' on mee? Of oni' ho mutenab am mak, "Tuaf amaufiunt ein, ro tebes he naperin Uisneno In hukun." Te kaah, ho mmoe' rais maufinu on re' sin imsa'. Mes ho mutenab am mak, "Hukun Uisneno na'roo na'ko kau." On nai te, in a'suikn ii saa'?

⁴ Uisneno nakrira' In nekan arekot neu ko. In nsabaar ma nneek amnaun anmatoom nok ho 'moe'm ein. Mes nansaa' am es ho ka mkisu mtoom Ee fa? Of oni' ho ka muhiin fa mmak, In nakrira' In nekan arekot neu ko, he ho mufetin ma musaitan ho sanat ma penu sin, ma mtebi mfain meu Ne.

⁵ Mes ho re' ia, a'naak fatus ma ka mroim fa he mutniin! Ma ho ka mroim fa he musaitan ho sanat ma penu kre'o msa'! Onaim ho mmoe' he ho rais hukun sin ma'fena' ntein' ein. Oras pah-pinan ia namsoup, Uisneno of nataib mansian ein ok-oke' sin a'moink ein. Ma mansian ein ok-oke' of nahinin nak, Uisneno nafeek tuaf-tuaf sin raik ein, ro natai ma namnoon. Oras naan, In hukun ko ma'fena', natuin In ka ntoup fa ho 'mo'em maufiun ein. ⁶ Ho 'monim on mee te, Uisneno of anbaras natuin ho 'mo'em naan. ☆

⁷ Fin tuaf re' anmoe' rais reko piut-piut, In of anfeen sin 'monit amneot re' ka natfeek niit fa. Sin esan re' antoupun rais hormaat, kaan reko, ma nmonin piut-piut nok Ne. ⁸ Mes Uisneno ka ntoup fa tuaf re' anmoe' maufinu. In natoo' neu sin batuur-batuur, fin sin suma nahini haa rais maraban. Sin ka nmoe' natuin ein fa rais amneot ma amnonot, fin sin suma nmo'en natuin rais maufinu nmees jah.

⁹ Tuaf-tuaf re' nmoe' rais maufiun ein, of napenin susat ma ma'ne'at. Maski atoin Yahudis, ai' atoin ka Yahudis fa, sin napenin ok-oke'. * ¹⁰ Mes tuaf-tuaf re' nmoe' rais reko, of Uisneno naikas narat-ratan sin, ma nhormaat sin he nmonin nok mamut, rame' es nok es, ma tainina'. Maski sin atoin Yahudis, ai' atoin ka Yahudis fa, sin napenin ok-oke'. ¹¹ Fin Uisneno ka npiir fa humaf!☆

¹² Uisneno In Atoran antoom mansian ii ok-oke'. Karu nmui' tuaf re' ka nahiin fa Atoran naan, ma nmo'e nsaan, Uisneno of napaisb ee ma ntitar napoitr ee. Ma karu nmui' tuaf re' nahiin Atoran naan, mes in nmo'e nsaan, Uisneno of anpaek Atoran naan antein he nafeek hukun neu ne. Uisneno of napasib sin ma ntitar napoitan sin, natuin sin ntanhain In Atoran naan. ¹³ Karu mroim he mmarama' mok Uisneno, ka nanokab fa karu mneen In Atoorn ahaa. Fin tuaf ro he nmoe' natuin In Atoran, na' In ntoup sin imsa'. Kais suma mneen aah!

¹⁴ Maski ka atoin Yahudis fa ka nahiin fa Uisneno In Atoorn ee in afan, mes na'ko sin kuuk anmui' tuaf re' anmoe' natuin Atoran naan. Natuin sin neek ein kuuk es re' natanon sin, mee es re' batuur, ma mee es re' ansaan.

* 2:9 Suur Akninu' uab Yunani ntui mnak, "nfee nahuun neu atoin Yahudis sin, ma nfee neu atoin ka Yahudis fa msa'." Anbi era' seo (9), in sairt ii nak, "Are' pah ii of napein susat, anneis-neis atoin Yahudis, ma atoni' ka Yahudis fa msa'." Anbi era' bo'es (10), in sairt ii nak, "Uisneno of nait na'rat-ratan tuaf ein re' ammo'en rais reko, anneis-neis atoin Yahudis, ma atoni' ka Yahudis fa msa'." ☆ 2:11 Surat re' Nareta' Nafani' Raan A'honis 10:17

¹⁵ Nok ranan naan sin naruru' mnak, Uisneno In Atoran matu'i et sin neek ein, on re' abas re' Uisneno nteun nggoe nbi sin neek ein. Sin nekak naank ein es re' nataib kuuk saa' re' sin nmo'e. Rarit sin teenb ein kuuk es re' nakuu sin karu sin nmo'en nsanan, ma natonan sin karu nmo'en batuur. ¹⁶ Onaim oras Uisneno nait inrair Yesus Kristus njair Afeek Rasi, In he nparikas tar namnuut rasin re' ma'nifa' ma ma'koro' nbi atoni' in nekan. Au unoni' tuaf-tuaf on re' naan, on re' matu'i et Uisneno In Rais Reko.

Maski atoin Yahudis anmoe' natuin Uisneno In Atoran, mes naan ka nsoi nafetin sin fa

¹⁷ Onaim hi atoin Yahudis, on mee? Hi es re' maikas ma mi'ratan hi tuam ein mak, hi kiim es re' amnaa' Uisneno In Atoran re' In nasaunt ee npeo' ka'o Musa. Batuur, ai' kaah? Hi mifeef amsa' anmatoom nok hi 'moinm ein mok Uisneno. ¹⁸ Batuur! Hi mihini mrair Uisneno In romin. Hi mihini mrair mee es re' reko nneis. Hi mihini mrair rasin ia ok-oke', natuin tungguurn ein nanoni' nrair ki na'ko Uisneno In Atoran. ¹⁹ Hi mpirsai hi tuam ein mak, hi bisa miruru' ranan meu tuaf re' ka nahiin fa he nnao neu mee. Hi maan hi tuam ein on re' me'u re' ntana' neu tuaf re' nmoni nbi meis'okan. ²⁰ Natuin hi mnaa' Uisneno In Atoran, hi mitenab hi mihiin are' saa' ii ok-oke', ma hi mnaa' are' saa' ii ok-oke' re' batuur. Batuur, ai' kaah? Etun hi mitenab mak, hi bisa minoni' atoin amonot ma ri'ana' re' ka nahiin fa saa'-saa'.

²¹ Onaim au he utaan ki on nai: hi mroim he minoni' tuaf bian sin, mes nansaa' am es hi ka mroim fa he minoni' kiim saa'-saa'? Hi mroim he msae mimbar, he miprenat am mak, "kais mibaak." Mes nansaa' am es hi kiim mibaak? ²² Hi minoni' mak, "Kais ammakeak ma mmakoin mok tuaf re' ka ho moen ja fa, ai' ka ho fee ja fa." Mes nansaa' am es hi kiim ammakeak? Hi msak batuur-batuur meu baer fuat ein, mes nansaa' am es hi mputa-kriu bare' na'ko uim fuat? ²³ Hi mifeef anmatoom nok Uisneno In Atoran, mes nansaa' am es hi mtanhai Atoran naan, ma mimaeb Uisneno on re' naan? ²⁴ Fin

na'ko unu', matu'i et Suur Akninu' Uisneno mnak, "Tuaf bian sin ankana'paar Uisneno In kanan, natuin hi atoin Yahudis hi maufinum."☆

Maski atoin Yahudis na'heri', naan ka nsoi nafetin sin fa msa'

²⁵ Hi atoin Yahudis ro he mi'heri' mituin Uisneno In Atoran. Batuur, ai' kaah? Naan anjair tanar nak, hi es re' ammui' hak he mtoup Uisneno In rais manba'an. Mes karu hi mtanhai Uisneno In Atoran, Uisneno ka ntoup ki fa. Hi mjair on re' atoin ka Yahudis fa, ma atoni' re' ka na'heri' niit fa. ²⁶ Mitenab mirek-reko'! Fin karu atoni' re' ka na'heri' fa natuin Uisneno In Atoran, Uisneno of antoup goe on re' in atoin Yahudis re' na'heri' nrair. On mee? ²⁷ Mes ampaant om! Fin karu atoin ka Yahudis fa re' ka na'heri' fa anmoe' natuin Uisneno In Atoran, sin naruru' saa'? Sin naruru' hi sanat ma penu mnak, hi atoin Yahudis re' mi'heri' nrair, amtanhai Uisneno In Atoran, maski hi mnaa' amrair Uisneno In Atoran mi'ko afi unu'.

²⁸ Kais mitenab mak, tuaf re' anjair ka'o Abraham in sufan-ka'un, ma re' na'heri' nrair in pasun re' naan es re' anmoe' je njair Uisneno In tuaf re' namneo ma namnoon. Kaah fa, tua! ²⁹ Re' anjair Uisneno In tuaf re' namneo ma namnoon, es re' tuaf re' nmarama' nok Uisneno. Fin rasi 'heri' re' batuur, re' nmoe' tuaf anjair Uisneno In anah, ka matanar fa nbi aok a'pohon, mes matanar anbi nekak, re' Uisneno In Asmaan Akniun' ee nmo'e. Uisneno kuun es re' naikas ma nbo'is tuaf on re' naan, ka mansian fa, tua.☆

3

Maski atoin Yahudis anmui' hak he ntoup pusaak na'ko Uisneno In rais manba'an, naan ka nsoi nafetin sin fa msa'

☆ 2:24 Nai' Yesaya 52:5 ☆ 2:29 Surat re' Nareta' Nafani' Raan A'honis 30:6

¹ Karu on naan ate, atjair atoin Yahudis re' ma'heri' te, in upan saa'? Of oni' hi mitenab mak, atoin Yahudis napein ko'u nneis ma reko nneis, na'ko atoin ka Yahudis fa. Batuur, ai' kaah? ² Batuur! Atjair atoin Yahudis, anmui' in upan anbi rasi mfaun. Esan re': ahunut, natuin Uisneno anfee mepu neu atoin Yahudis he nruun ma ntui ma mpanat narek-reko' In Kabin ma Prenat. ³ Onaim on mee? Of oni' hi mitenab mak, Uisneno ka bisa nmoe' natuin fa saa' re' In na'uab, natuin anmui' atoin Yahudis bian re' ka npirsai Je fa. Batuur, ai' kaah? ⁴ Ka neu fa, tua! Fin maski mansian ii ok-oke' abitan pah-pinan ia aputa-kriut ein, mes Uisneno kuun na'uab namneo ma namnoon piut! Mimnau, fin matu'i et Suur Akninu' anmatoom nok Uisneno In tuan am nak,

“Anmui' tuaf re' nasaeb sanat am nak,
 In ka nafeek fa rasi natai ma namnoon.
 Mes sin of nahinin am nak,
 saa' re' In na'uab ee naan, ro batuur on re' naan.
 In ro n'iis ma niis,

natuin In ro tebes ma ka bisa fa he na'uab ansaan.”☆

⁵ Mes karu hit tmo'e tsaan, rasi naan naruru' ma nakrira' ntein neu mansian ii ok-oke' mnak, saa' re' Uisneno nmoe' je naan, ro batuur on re' naan. Karu on naan, hit he tak saa'? He tak, Uisneno nhukun kit ka natai ma namnoon fa, ai'? (Fin anmui' tuaf bian na'uab on naan ate.) ⁶ Ka neu fa, tua! Uisneno ka nsaan fa karu In nhukun kit. Fin In nmui' hak he nhukun tuaf-tuaf re' anmo'e nsanan nbin pah-pinan ia.

⁷ Onaim karu au aputa-kriut, naan naruru' ma nakrira' mnak, Uisneno In hukun naan, batuur. Karu au ukrira' ma ururu' 'rair In pinan ma krahan on naan, nansaa' am es In naprikas au 'monik, rarit nafeek au rasi mnak, saa' re' au 'moe' je naan, ansaan? ⁸ Kais on naan, tua! Fin karu hi he mituin tenab on naan, hi mituin tuaf re' nak, “Maut

☆ 3:4 Siit Pures-Bo'is sin 51:4

he hit tmoe' maufinu amfaun antein, maut he rais reko na'baab ok amfaun amsa!" Tuaf re' na'uab on re' naan, ro tebes napein hukun. Mes anmui' tuaf re' na'uab na're'uf au kanak nak, au unoni' tuaf-tuaf a'saan on naan.

Ka tiit fa tuaf es, re' neekn ee namneo ma namnoon, fin hit mansian ii atmo'e tsaan ok-oke'

⁹ Onaim on mee? Hi mitenab hit atoin Yahudis es re' reko nneis na'ko atoin ka Yahudis fa? Kaah fa, tua! Fin au ururu' ma ukrira' ki 'ak, ansuun tuaf ro nmo'e nsanan, maski in atoin Yahudis, ai' ka atoin Yahudis fa. ¹⁰ Fin matu'i et Uisneno In Suur Akninu' mnak, "Ka nmui' fa tuaf re' nmoin namneo ma namnoon piut.

Ro tebes! Ka tiit tiit fa tuaf mese' msa'!

¹¹ Ka nmui' fa tuaf re' nahiin batuur-batuur anmatoom nok Uisneno.

Ka tiit fa tuaf mese' msa' re' naim ranan he nahiin Uisneno.

¹² Sin arsin anbeon ma npenun nrarin na'kon sin a'moink ein re' namneon ma namnonon.

Rarit sin ka mapaek ein fa goen.

Ka tiit fa tuaf re' naruru' ma nakrira' neek reko.

Ka tiit tiit fa mese' msa'![☆]

¹³ Sin uabk ein, ro foo punu', on re' noup nitu re' atoni' nhain nafani'.

Sin feefk ein suma napoitana puta-kriu goah.

Sin uabk ein re' npoin na'kon sin feefk ein,

on re' kaun aan in raso.[☆]

¹⁴ Sin feefk ein suma nahini haa he naseuk ein, ma na'uab na're'uf he nneek menab atoni'.
fin naan anpoin na'kon sin neek reu'f ein.[☆]

¹⁵ Sin ka namtaun fa he nroor na'maet atoni'.

¹⁶ Sin nnaon neun bare mee-mee jah ate.

sin anmataisiub ein nbin naan,
ma nasusab atoni' nok rasi huma'-huma'.

[☆] 3:12 Siit Pures-Bo'is sin 14:1-3, 53:1-3 [☆] 3:13 Siit Pures-Bo'is sin 5:10,

140:4 [☆] 3:14 Siit Pures-Bo'is sin 10:7

17 Sin i'moink ein ka nmu'in fa rais mamut ma rame',
ma ka nmonin fa nok neek mamut. ☆

18 Sin ka bisa naran ma ntahan naan fa sin tuak ein,
natuin sin ka nmu'in fa neek amtaus a'kre'o neun
Uisneno msa'." ☆

19 Hit tahiin tak, Uisneno nfee In Atoran neu tuaf re'
ro he nmoin natuin Atoorn ein naan. Nok ranan naan,
sin ka nmu'in fa rasi 'sukif saa'-saa' antein. Of ansuun-
suun tuaf anbi pah-pinan ia, ro he nbaisenun n'anin
Uisneno, he In nafeek sin rasin am nak, sin ansanan, ai'
kaah. 20 Es naan ate, ka tiit fa tuaf es, re' bisa na'uab am
nak, "Uisneno nmarak kau mnak, atoin neek amne'o ma
amnonot, natuin au 'moe' utuin In Atoorn ein ok-oke'."
Ka bisa fa, tua! Fin Uisneno In Atoran re' naruru' ma
nakrira' mnak, hit ar-arkit atmo'e tsaan. ☆

*Hit ro he tpirsai Usif Yesus fe', na' Uisneno nmarak kit nak
hit neek amneot ma amnonot*

21 Kais amkeuk anmatoom nok Uisneno In reon re'
naruru' ma nakrira' ranan he hit bisa tareko tfain tok Ne.
Batuurn ii, hit bisa tareko tfain tok Ne, mes ka natuin fa hit
tmoe' tatuin In Atoran. Fin In Atoran naan, antui on naan,
ma In mafefa kniun' ein un-unu' natonan anbi Uisneno
In Suur Akninu' on naan amsa'. 22 Uisneno nmarak kit
nak atoin neek amneot re' he tareko tfain tok Ne, oras hit
tpirsai teu Yesus Kristus. In ka npiir fa humaf, fin In nmoe'
on re' naan neu tuaf ein ok-oke' re' anpirsain neun Usif
Yesus on naan. ☆

23 Fin are' mansian ii ok-oke' nmo'en sanat. Es naan
ate, tuaf re' nsoba' he nareok on nok Uisneno, ka bisa
ntean fa In tu'in re' mapina'-makraha'. 24 Maski on naan
amsa', mes Uisneno kuun es re' naruru' ma nakrira' In
nekan arekot, ma nafeek nak, hit ka tsaan fa goen antein.
In ntoup kit on naan, natuin Yesus Kristus ansoi nafetin
naan kit na'ko hit sanat ma penu sin.

☆ 3:17 Nai' Yesaya 59:7-8 ☆ 3:18 Siit Pures-Bo'is sin 36:2 ☆ 3:20 Siit

Pures-Bo'is sin 143:2, Galatia 2:16 ☆ 3:22 Galatia 2:16

²⁵⁻²⁶ Uisneno naruru' ma nakrira' neu Usif Yesus he njair fua'-turu' re' natai nafani' kit ma nnoes nain hit sanat ma penu sin. Mes hit ro he tpirsai Je tak, In ntoup hit sapaaf anbi rais hukun. Onaim In n'opa' ma nasaik In naa', ma nmate nsenu' kit. Nok ranan naan, Uisneno naruru' ma nakrira' nak, saa' re' In nafeek ee naan, ro batuur. Unu' te, In naran ma nsabaar ma'tani', rarit In npiir he nnikan nain sanat ma penu re' atoni' nmo'e nrair sin. Mes karu In ka nhukun fa tuaf re' ansaan, In ka njair fa afeek rasi re' natai ma namnoon. Onaim In nfei ranan, maut he Yesus Kristus bisa nasaah hit atoin asanat hit hukun. Oras ia, In naruru' ma nakrira' neu mansian ii ok-oke' mnak, In nmoe' rais reko piut. Rarit tuaf-tuaf re' ansaan, re' anpirsai neu Nai' Yesus, In nafeek he nmarak sin, atoin neek amneot.

²⁷ Onaim on mee? Of oni' hi mitenab hi bisa mifeef, natuin Uisneno ntoupu nrair ki, ai'? Ka bisa fa, tua! He naruru' ki Atoran es he hi mireok om mok Uisneno, oo? Hi mitenab of Uisneno ntoup ki natuin hi mmoe' rais reko, oo? Ka bisa fa, tua! Hit suma bisa taruru' Atoran re' nak, Uisneno ntoup kit natuin hit tpirsai Nai' Yesus. On re' naan, tua!

²⁸ Es naan ate, oras ia hit tahiin on nai: atoni' bisa narekon nok Uisneno natuin sin npirsai Je, ka natuin fa sin nmo'en natuin In Atoran.

²⁹ Au he utaan on nai: Uisneno suma antoupu haa atoin Yahudis, aa oo, ai' In ntoup bian amsa'? Batuur! In ntoup mansian ii ok-oke'!

³⁰ Fin Uisneno, suma mees' aah. Ma suma nmui' ranan mees' aah he In ntoup kit mansian ii he bisa tareko tfain tok Ne. Es re', hit ro he tpirsai teu Kristus. Ranan re' naan, anfei je neu atoin Yahudis ma ka Yahudis fa msa'.[☆]

[☆] 3:30 Surat re' Nareta' Nafani' Raan A'honis 6:4, Galatia 3:20

³¹ Onaim au he utaan on nai: karu hit tpirsai Uisneno, re' naan annoes nain In Atoorn, aa oo? Kaah fa, tua! Re' batuurn ii, naan anmoe' Atoran naan saah.

4

A'tope' na'ko ka'o Abraham. Uisneno antoup goe natuin in npirsai je

¹ Onaim tait i'tope' ta'ko hit atoin Yahudis hit be'i-na'i, ka'o Abraham. Hit bisa tanoni' saa' na'ko in tuan, anmatoom nok tuaf nareko nfain nok Uisneno natuin in npirsai Kristus?

² Hit bisa tanoni' on nai: karu Uisneno ntoup ka'o Abraham natuin in nmoe' rais reko, in nmu'i 'sukif amsa' he bisa nafeef anbi mansian ii in human ma in matan. Mes anbi Uisneno In matan, in ka bisa fefa' mese' fa. ³ Mes matu'i et Suur Akninu' Uisneno mnak, "Natuin nai' Abraham anpirsai Uisneno,

es na' Uisneno nmaark ee nak, atoin neek amneot ma amnonot re' nmarama' nok Ne."☆

⁴ Tait i'tope' es antein: ameput antoup in kai. Kai naan ka roi parseen fa, mes roit re' a'naakf ee nbaen ee he nsenu' ma nseka' atoni' naan in haet ma maskeet. Fin ameput naan in hak. ⁵ Uisneno nmui' hak he nak, tuaf re' npirsai neu Yesus Kristus bisa nareko nfain nok Ne, maski unu' atoni' naan anmo'e nsaan ma ka nfairoir fa Uisneno. Ka tiit fa rais jes re' atoni' bisa nmoe' je, he in nareok on nok Uisneno. Fin atoni' ro npirsai neu Yesus Kristus, na' Uisneno nmaark ee mnak, in atoin neek amneot ma ntoup goe.

⁶ Usif nai' Daut natoon amsa' mnak, atoni' neekn ee nmariin oras Uisneno nmarak sin nak, sin re' naan atoin neek amneot, maski sin ka nmo'en fa saa'-saa' amsa'. Fin nai' Daut antui mnak,

⁷ "Maski atoin ein ia ntanhai Uisneno In Atoran,

☆ 4:3 Reta' Ahun-hunut 15:6, Galatia 3:6

mes In nsaok nain sin sanat ma penu sin.

Etun sin napenin upan arekot anneis-neis!

Amoe' rais maufiunt ein,

Uisneno nnikan ma nniahan anrair sin sanat ma penu sin.

⁸ Fin karu Uisneno ka nsoi' fa sin sanat ma penu sin,

atoni' naan napein upan arekot batuur!"[☆]

⁹ Of oni' hi mitenab mak, suma atoin Yahudis re' na'heri', re' bisa napein upan he nareko nfain nok Uisneno. Batuur, ai' kaah? Ma atoni' na'ko pah bian re' ka ma'heri' fa, ka bisa fa, ai'? Kaah fa, tua! Tenab on naan, ansaan! Es re' hai mimnaub main ki mmak, natuin ka'o Abraham anpirsai neu Uisneno, es na' Uisneno nmaark ee, atoin neek amneot re' anmarama' nok Ne. ¹⁰ Oras mee Uisneno nmarak ka'o Abraham on naan? Oras in na'heri' nrair, ai' oras in ka na'heri' fa fe'? Re' batuurn ii, oras in ka na'heri' fa fe'.

¹¹ Batuur! Oras ka'o Abraham ka na'heri' fa fe', Uisneno nmarak anrair je goen nak, atoin neek amneot. A'roo-roo te, na' in na'heri' he njair tanar nak, in anjair tuaf re' anpirsai Uisneno. Nok ranan naan, ka'o Abraham es re' nfei ranan neu mansian ii ok-oke' re' npirsain neun Uisneno. Fin Uisneno ntoup tuaf mese'-mese' re' npirsai Je, he sin nareko nfanin nok Uisneno, maski sin na'heri', ai' kahaf.[☆] ¹² Ka'o Abraham amsa' nfei ranan neu hit atoin Yahudis re' ma'heri'. Ka *natuin* fa nak hit ma'heri', mes natuin hit tpirsai Kristus, on re' ka'o Abraham anpirsai Uisneno, oras in ka ma'heri' fa fe'.

Karu hit tpirsai teu Uisneno, hit tapein saa' re' In nba'an

¹³ Uisneno nahake' rais manba'an nok ka'o Abraham ma in sufan-kau'n ein nak, a'roo-roo te, pah-pinan a'teme-'teme njair sin pusaak. Uisneno nahake' rais manba'an on naan, natuin ka'o Abraham anpirsai Je,

[☆] 4:8 Siit Pures-Bo'is sin 32:1-2 [☆] 4:11 Reta' Ahun-hunut 17:10

rarit Uisneno nmaark ee mnak, atoin neek amneot re' nmarame' nok Ne. Mes Uisneno ka nahake' fa rais manba'an on naan, natuin ka'o Abraham anmoe' natuin In Atoorn ein.✠

¹⁴ Fin karu atoni' re' suma nmoe' natuin Uisneno In Atoran bisa ntoup naan pusaak re' Uisneno nba'an nrair je, in oetn ii nak, atpirsai teu Uisneno naan parsuum ahaa. Ma Uisneno In rais manba'an naan ka mapake' fa msa'.✠

¹⁵ Uisneno In Atoran anbi mee te, anbi naan atoni' ntanghai Atoran naan amsa'. Ma karu atoni' ntanghai In Atoran, Uisneno natoo', rarit In hukun sin. Ma karu Uisneno ka nmui' fa In Atoran, of ka nmui' fa atoni' re' ntanghai Atoran naan.

¹⁶ Es naan ate, hit ro he tpirsai Je. Naan, pentiing anneis na'ko saa'-saa' ii ok-oke'. Fin Uisneno naruru' ma nakrira' In neek arekot ruum-ruum aah neu atoni' re' anpirsai Je. Ma karu hit tpirsai Je nahuum on re' ka'o Abraham, ro hit ttoup saa' re' In nba'an, maski hit atoin Yahudis re' tmoe' tatuin In Atoran, ai' kaah. Onaim hit ok-oke' re' atpirsai teu Kristus naan, on re' ka'o Abraham in sufan.✠ ¹⁷ Anbi Uisneno In Suur Akninu', In nba'an neu ka'o Abraham am nak, "Au 'moe' he ho mjair aam uuf meu uuf amfaun." Ka'o Abraham anpirsai Uisneno. Rarit a'roo-'roo te, Uisneno nmoe' natuin In rais manba'an naan. Uisneno es re' namonib nafani' amates amsa'. In suma na'uab aah, saa'-saa' re' ka nmui' ma tiit sin fa, anjair nanin.✠

¹⁸ Ka'o Abraham anpirsai Uisneno ma npao-pao Goe, maski in ka nmui' fa anah fa fe'. Es naan ate, Uisneno nmoe' je njair "aam uuf neu uuf amfaun." Re' naan, on re' matu'i nbi Uisneno In Suur Akninu' mnak, "Sufan amfa-faun neman na'ko ko."✠ ¹⁹ Ka'o Abraham anpirsai

✠ 4:13 Reta' Ahun-hunut 17:4-6, 22:17-18, Galatia 3:29 ✠ 4:14 Galatia 3:18 ✠ 4:16 Galatia 3:7 ✠ 4:17 Reta' Ahun-hunut 17:5 ✠ 4:18 Reta' Ahun-hunut 15:5

ma'tani' neu Uisneno, maski in nahiin neu in namnais re'-reu'f een. In nmoin naan toon nautn es een. Ma ain Sara' ankiu, ma namnais re'-reu'f een amsa'.[☆] ²⁰ Mes ka'o Abraham in pirsait naan ka na'oin on fa, ai', he natenab am nak Uisneno ka bisa nmoe' natuin fa In rais manba'an. In pirsait neu Uisneno ma'tani' anteni' oras in ntuna' ma na'ratan Uisneno In kanan. ²¹ Ka'o Abraham anpirsai batuur-batuur nak, saa' re' Uisneno nba'an anrair je naan, In bisa nmoe' natuin ee. ²² Etun Uisneno nmarak ka'o Abraham, atoin neek amneot re' nmarama' nok Ne.

²³ Mes Uisneno In Suur Akninu' antui mnak, Uisneno ka nsoi' ma nareon fa on naan neu ka'o Abraham anmees jaah, ²⁴ mes anfee neu kit imsa'! Fin karu hit tpirsai Je, In nmarak kit imsa' atoin neek amneot re' tareko tfain tok Ne. Fin Uisneno re' ia, In es re' namonib nafani' hit Usi' Yesus na'ko In a'maten. ²⁵ Nai' Yesus anmaet, natuin hit tmo'e tsaan. Rarit In nmoni nfain he nfei ranan, maut he hit bisa tareko tfain tok Uisneno.[☆]

5

Atoni' bisa nareko nfain nok Uisneno asar anpirsai neu Yesus Kristus

¹ Onaim natuin hit tpirsai teu Uisneno, es naan ate In nmarak kit atjair atoin neek amneot ma ammonot. Rarit hit neek ii nakninu' nrair neu Uisneno, natuin hit Usi' Yesus Kristus, re' Uisneno nreek haefn Ee ntaam neem, anfei ranan he hit bisa tmarama' on naan. ² Kristus naruru' ma nakrira' In nekan arekot neu kit, natuin hit tpirsai Je. Etun hit neek ii bisa nma'tain ma na'bei'. Ma hit neek ii anmariin, natuin hit tahiin tak, Uisneno of he nait kit he hit tnaben tok In pinan ma In akrahan.

³ Maski hit tapein susat ma ma'ne'at huma'-huma', mes hit neek ii nmariin piut. Fin hit tahiin tak, hit tanoni' ta'ko susat ma ma'ne'at, he bisa taran ma ttahan ma'tani' tneisi

[☆] 4:19 Reta' Ahun-hunut 17:17 [☆] 4:25 Nai' Yesaya 53:4-5

ttein. ⁴ Karu hit taran ma ttahan atbi susat ma ma'ne'at, naan anmoe' kit ka tmouf fa, ma hit i'moink ii nharineb Uisneno In nekan. Karu hit tmoin reko nneis on naan, naan anmoe' hit rais pirsait naheer anneis nak, Uisneno of naruru' ma nakrira' In nekan arekot neu kit. ⁵ Karu hit tpirsait ii na'kii' ma naheer antein, hit ka tamaeb ok fa. Fin Uisneno nfee kit In Asmaan Akninu', he hit bisa tahiin atbi hit nekak nanan tak, In neek kit ma'tani'.

⁶ In naruru' ma nakrira' In manekan on nai: oras hit ka bisa tareok ok fa fe' tok Uisneno, te kaah, In nreek haefan Kristus he nmaet neu kit re' tmoni te ka tfairoir fa Uisneno. Uisneno npiir naan oras re' nateef on naan.

⁷ Mitenab mirek-reko' fe'! Fin ka biasa fa nmui' tuaf re' nroim he nmate nsenu' ma nseka' in aon-bian re' neek amneot. Of oni' nmui' tuaf bian re' nroim he nmaet he nturun ma nbaab tuaf re' neek reko. ⁸ Mes Uisneno naruru' ma nakrira' In nekan arekot anneis-neis neu kit. Natuin oras hit tmo'e tsaan fe'e te, Kristus anmaet neu kit.

⁹ Uisneno nmarak kit atoin neek amneot re' tareko tfain tok Ne, natuin Kristus nat'opab ma nasaib In naa' he nmaet neu kit. Te kaah, karu tuaf anmo'e nsaan, Uisneno natoo'. Mes natuin Kristus anmoe' on naan, hit re' atmo'e tsaan ka tapein fa hukun attein.

¹⁰ Unu' te, hit mamuus tok Uisneno. Mes Uisneno In Aanh aa kuun es re' anmaet he nhainiik ma n'oeteneb Uisneno In nekan, maut he hit bisa tmarama' tok Uisneno. Onaim oras ia, hit ka tmamuus fa heen, mes tmarekob atfain. Anneis-neisi ntein, natuin Kristus anmoni nfain, anbi neon amsopot of In nsoi nafetin kit he hit kais tapein Uisneno In hukun attein. ¹¹ Ka neu fa he on naan ahaa! Hit neek ii bisa nmariin am nak, "Uisneno naan, mapina' ma makraha'!" natuin hit tmafuut tok Ne. Hit bisa tjair In tuaf ein, natuin hit Usi' Yesus Kristus, anmaet neu kit, he nmoe' kit tmarama' tok Uisneno.

Tataib nai' Adam nok Kristus te, anmui' in amnesan ma suri

¹² Na'ko unu', mansian ahunut, es re' ka'o Adam re' nmurai nmo'e nsaan. Etun Uisneno ka nkoon ee fa he

nmo'in piut. Rarit anmurai na'ko oras naan, mansian ii ok-oke' nbi pah-pinan ia nmo'e nsanan on re' in imsa'. Natuin sin nmo'e nsanan on re' in, sin ok-oke' ro he nmaten on re' in imsa'.[☆] ¹³ Un-unu' te, oras Uisneno ka nasanut In Atoorn ein fa fe', atoni' nmo'e nsanan nbin pah-pinan ia 'teme-'teme. Mes natuin ka nmui' fa Atoran fa fe', es ka nmui' fa aso'it neu tuaf ein sin sanat ma penu sin. ¹⁴ Na'ko ka'o Adam, tar antea ka'o Musa ntoup Uisneno In Atoran, mansian ii ok-oke' ro tebes, anmaet. Maski sin ka ntanhain fa Uisneno In aprenat re' In nfee je neu ka'o Adam, mes sin nmo'en sanat huma'-huma' bian fe'. Etun sin ro he nmaten on re' ka'o Adam.

Karu hit tataib ka'o Adam nok Usif Yesus, anmui' in amnesan, ma nmui' in suri. Fin ka'o Adam gambar mese' re' naruru' ma nakrira' msa' Nai' Yesus In human, re' he neem. ¹⁵ Mes ka'o Adam anmo'e nsaan, ka huma' mese' fa on re' Nai' Yesus anmoe' reko neu kit. Natuin tuaf es, es re' ka'o Adam, antanhai Uisneno In aprenat. Es naan ate, are' mansian ii ok-oke' ro he nmaten. Mes Tuaf es antein, es re' Yesus Kristus, anmoe' rais reko mfaun neu kit, ma ka nafnekan ma nharap fa he atoni' nbaras In a'moe' rekon naan. Tuaf es anmoe' on naan, nanokab neu mansian ii ok-oke', fin Uisneno nroim he nmoe' reko neu kit. ¹⁶ Rasin re' Uisneno nfee sin neu kit naan, ka huma' mese' fa nok sanat re' tuaf es, es re' ka'o Adam anmo'e. Oras In nmo'e nsaan, Uisneno nafeek am nak, "Ho msaan. Onaim ho ro he mupein hukun!" Mes maski tuaf anmo'e nsaan tuunb es, Uisneno es naprikas mansian ii ok-oke' sin i'moink ein. In nroim he naruru' ma nakrira' In nekan arekot fe', ma nafeek nak, "Au 'marak ko m'ak ho ka msaan fa. Onaim oras ia ho mupein fetin ma ka mupein fa ho hukun antein. Uum he mureko mfain mok Kau!" ¹⁷ Onaim tuaf es, es re' ka'o Adam, anmo'e nsaan ma ntanhain Uisneno In aprenat. Etun oras ia, mansian ii ok-oke' ro he nmaten. Mes Tuaf es antein, es re' Yesus Kristus, anmoe' rais reko. Natuin In

☆ 5:12 Reta' Ahun-hunut 3:6

anmoe' rais reko, es na' hit bisa tareko tfain tok Uisneno. Naan on re' baer es, re' In nfee je parsuum aah neu kit. In nroim he nfee kit 'monif amneot, on re' hit tjair Uisf ee In partei ngguin.

¹⁸ Onaim tuaf es anmo'e nsaan, nfei ranan he mansian ii ok-oke' ro he nriu' sin na'ko Uisneno In human ma In matan. Ma Tuaf es anmoe' batuur, re' nfei ranan he mansian ii ok-oke' bisa nareko nfanin nok Uisneno, he nmonin batuur nok Ne. ¹⁹ Au sairt ii on nai: ka'o Adam naan tuaf es, re' ka nroim fa he nneen Uisneno, rarit antanhai In aprenat. Ma too mfaun ein anmo'e nsanan on re' in imsa'. Rarit Nai' Yesus naan, Tuaf es, re' nneen ma natniin Uisneno, rarit anmoe' natuin In romin. In es re' anfei ranan he too mfaun ein bisa nareko nfain nok Uisneno.

²⁰ Uisneno nasanut In Atoran neu ka'o Musa, he mansian ii ok-oke' nahiin narek-reko', mee es re' nsaan. Mes anbi mee-mee jah atoni' in sanat namfau ntein, anbi naan Uisneno naruru' ma nakrira' amsa' In nekan arekot nathoe nneis. ²¹ Unu' te, maufinu nbi atoni' in nekan anmui' kuasat he n'ator sin, tar antea anmo'e nsanan re' neik sin neun hukun a'maten. Mes oras ia, rais reko re' hit Usi' Yesus Kristus anmoe' je naan, Uisneno npaek je he naruru' ma nakrira' In nekan arekot neu kit. Nok rais reko naan anmui' kuasat he n'ator kit, rarit hit bisa tareko tfain tok Uisneno, tmoin batuur tok Ne piut-piut amsa'.

6

Hit ro he tasaitan hit sanat, he tmoin tatuin Uisneno In romin

¹ Onaim oras ia, he ta'uab saa'? Oni' hi mitenab am mak, "Uisneno annikan nain hi sanat ma penu sin, natuin In neekn ee reko. Etun reko nneis hit tmo'e tsaan piut, maut he Uisneno naruru' ma nakrira' In nekan arekot anneis-neis neu kit." ² Kais on naan, tua! Ka pantas fa karu hit tmo'e tsaan piut, fin hit tafeek tak, hit tkoit tasaitan hit sanat ma penu sin. Natuin hit ka tmafuut fa heen tok

maufinu ntein, re' naan on re' hit tmate trair jen! Fin tuaf re' nmate nrair ka bisa nmo'e nsaan antein fa. Batuur, ai' kaah? Karu hit tmaet on naan, on mee m'es hit bisa tmoin he tmoe' sanat antein? Ka bisa fa, joo!

³ Oni' hi ka mihiin fa mmak, oras nasrain kit, naan anjair tanar nak, hit tasaitan 'monit amnaa' he tjair atoin fe'u, es re' tmafuut tok Yesus Kristus. Naan on re' hit tmaet tabua tok Ne. ⁴ Oras Kristus anmaet, sin ansuub Ee. Oras nasrani nrair kit, naan on re' hit imsa' tmaet tasaitan 'monit amnaa', rarit sin ansuub kit. Aam Uisneno npaek In kuasan re' mapina'-makraha' he namonib nafani' Kristus na'ko In a'maten. Aam Uisneno nroim he hit ttoup In kuasan amsa', he tmoni tfani tjair atoin fe'u. ☆

⁵ Naan on re' hit tmaet tabua tok Nai' Yesus. Onaim hit re' tmafuut tok Ne, hit of atmoni tfain ta'ko hit i'matek, on re' In nmoni nfain.

⁶ Unu' te', hit tjair atoni' re' tmo'e tsaan huma'-huma'. Mes hit 'monik amnaa' naan namre'u nrair, on re' sin nkuus na'peti' kit tok Kristus tabua tbi hau nehe. Oras ia, maufinu re' nbi hit nekak ka nmui' fa kuasat he n'ator kit antein. Oras ia, hit ka tmafuut fa heen he tmoe' sanat antein. Fin hit ka on fa ate re' ka nmui' fa hak he npiir nak he nmoe' saa'. ⁷ Karu atoni' nmate nrair, in nafrei. Ka tiit fa es he bisa na'seek ee he nmoe' sanat antein.

⁸ Onaim natuin rasi naan on re' hit tmate trair tabua tok Kristus, hit tpirsai tak, hit of atmoin piut tok Ne msa'. ⁹ Hit tahiin tak, natuin Kristus anmoni nfain na'ko In a'maten, In ka nmate ntein fa goen. Fin ka tiit fa saa' es antein re' nmui' kuasa he nmoe' Je he nmaet. ¹⁰ Unu' te' In anmaet no mees' aah, he nfaki nporin saant ii in kuasan. Mes oras ia, In anmoin he naruru' ma nakrira' hormaat neu Uisneno.

¹¹ Hi ro he maan hi tuam ein on re' naan. On re' hi mmate nrair, es naan ate saant ii ka nmui' fa kuasa neu ki ntein. Onaim oras ia, hi ro he mmoin he miruru' ma

☆ 6:4 Kolose 2:12

mikrira' hormaat meu Uisneno, natuin hi mmafuut mok Yesus Kristus.

¹² Kais amkonan maufiun nggui nbi ho nekam anmui' kuasa he bisa n'ator ko, he ho suma mutuin ahaa ho aom aan in nromin, he mmoe' maufiun ein. Fin ro tebes, ho aom aan of ammaet. ¹³ Ma kais amnona' ho tuam aan he mmoe' rais reu'f ein re' naan, fin re' naan ansaan amsa'. Mes amnona' ho tuam aan meu Uisneno nmees, he In es an'ator ko. On re' ho mmate mrair, rarit ho mmoni mfain. Onaim ampaek ho tuam aan a'teme-'teme he mmoe' rais reko meu Uisneno. ¹⁴ Kais amkonan he saant ii bisa n'ator ki, on re' saant ii njair hi usif. Oras ia, hi kais ammoin mituin ka'o Musa in atoorn ein antein, he hi mireko mfain mok Uisneno. Fin hi mmoin mok amneot natuin Uisneno naruru' ma nakrira' In nekan arekot neu ki. Onaim oras ia, In nekan arekot naan es re' an'ator ki.

Hit tjair on re' ate re' tmeup tatuin Uisneno In romin

¹⁵ On mee? Of oni' hi mitenab mak, “Natuin hit kaisa' tmoin tatuin ka'o Musa in atoorn ein antein, he tareko tfain tok Uisneno, maski hit tmoe' sanat piut aah. Fin Uisneno nroim he naruru' ma nakrira' In nekan arekot neu kit!” Hi mitenab on naan. Batuur, ai' kaah? Au utoon ki he! Naan ansaan!

¹⁶ Au 'pake 'tope' na'ko usif ma ate. Karu hi mnona' hi tuam ein naan he mmeup meu tuaf es, hi ro he mneen am mitniin ee, ma mmeup mituin in romin. Fin in re' naan, hi usif. Ma hi re' naan in ate. On naan amsa', hi bisa mpiir he mituin meu mee. Hi bisa mpiir he mmoe' sanat, rarit hi mjair saant ii in ate. Mes karu hi mpiir on re' naan, hi mmoe' hi tuam ein he mbaits om mok Uisneno. Hi bisa mpiir he mmoe' rais reko, ma mjair ate re' mmoe' mituin saa' re' Uisneno nreun ma nreek neu ki. Karu hi mpiir on re' naan, hi bisa mireko mfain mok Ne!

¹⁷ Unu' te, hi mkonan saant ii he n'ator ki, mes oras ia, hi mneen am mitniin hi neekm ein, he mmoe' mituin saa' re' atoin asraint ein nanoni' ki sin. Etun au 'toit makasi

'eu Uisneno. ¹⁸ Fin Uisneno nsoi nafetin ki na'ko saant ii in kuasan, tar antea saant ii ka n'ator antein ki fa goen. Onaim oras ia, rasi re' amneot ma amnonot es re' n'ator ki.

¹⁹ Au u'uab ia, a'pake 'tope' neno-neno na'ko usif ma ate, he hi mihiin au sairt ii rabah. Unu' te, hi mnona' hi tuam ein amjair ate he mmoe' sanat, re' neik ki he n'oemetab hi tuam ein, mituin ka'o Musa in Atoran. Mes oras ia, hi ro mnona' hi tuam ein amjair ate he suma mmoin he mmoe' rais amneot ma amnoont aah, re' neik ki mbi Uisneno In human ma In matan amjari kninu'.

²⁰ Unu' te, oras hi suma mneen am mitniin ma mmoe' mituin saant ii in romin, hi kais mitniin ma mmoe' mituin rais amneot ma amnonot. ²¹ Au he utaan on nai: hi mipein upan arekot saa' na'ko hi 'moe' amreu't ein naan? Ka tiit fa, ai'? Te kaah, upan re' hi mipein je naan, namaeb ahaa ki. Natuin hi mmo'e msaan on re' naan, in amsoupn ii, Uisneno nkoit ki.

²² Mes oras ia, Uisneno nafetin ki na'ko usif amnaa', onaim hi kaisa' mmoe' sanat antein. Oras ia hi ro he mjair Uisneno In ameupt ein. In amsoupn ii, hi mjari kninu' meu Ne, ma mipein 'monit batuur re' ka natfeek niit fa.

²³ Fin oras hit tmo'e tsaan, in upan es re' Uisneno nkoit kit tar antea nabar-baar. Hit tmaet nai! Mes Uisneno nabarab anrair raan a'po'i neu kit. Fin In he nfee neu kit 'monit batuur re' ka natfeek niit fa nok ruum am parsuum aah. Ma hit tapein 'monit, karu hit ttaam atjair hit Usi' Yesus Kristus lin na.

7

Atoorn ii ka nmui' fa hak antein, karu atoni' nmate nrair

¹ Aok-bian arki! Oras ia, au u'uab 'eu ki re' ahiin atoorn ein. On nai: karu hi mmoin fe', atoorn ii nmui' hak he n'ator ki fe'. Mes karu hi mmate mrair, atoorn ii ka nmui' fa hak he n'ator antein ki.

² Au 'pake 'tope' na'ko atoran fee-mone. Karu bifee jes ansao nrair atoin es, tatuin atoran, sin nua sin anjarin fee-mone tar antea sin nmaten. Mes karu in moen je nmaet, bifee banu' naan ka nmafuut fa goen nok atoran naan. In bisa nsao ntein. ³ Mes karu in ansao atoni' 'teta' oras in moen je nmoin fe', tatuin atoorn ii, naan in nmakake nrair. Mes karu in moen je nmate nrair, atoran fee-mone ka ntoom ee fa goen antein. In napeni nrair fetin. Rarit karu in ansao ntein atoni' 'teta', tatuin atoorn ii, in ka nmakaek fa, tua.

⁴ On naan amsa' hi atoin apirsait! On nai: Kristus anmate nrair. Naan on re' hi mmaet bu'-bua' mok Ne, ma misaitan hi 'monit amnaa'. Rarit atoorn ii ka ntoom ki fa goen antein. Oras ia, hi mipein fetin mi'ko atoran naan, ma mmafuut goen mok Kristus, re' nmoni nfain na'ko In a'maten. Naan on re' bifee banu' re' ansao ntein. Ka tiit fa rasi. Onaim oras ia, saa' ii ok-oke' re' hi mmoe' je naan meu Uisneno.

⁵ Unu' te, hit suma tmoe' tatuin aah hit tuak ii in romin. Natuin hit tahiin atoran, naan anmoe' kit he troim he ttanhai atoorn ein naan, he tmoe' rasi re' ka batuur fa. Hit saant ein naan esan re' nmoe' Uisneno nkoit kit. ⁶ Unu' te, hit ro he tmoe' tatuin atoran. Mes oras ia atoorn ii ka ntoom antein kit fa goen, fin hit tafetin atrair hit i'monik amnaa'. Tatuin raan amnaa' ii in romin, ka'o Musa in atoran re' matu'i et Suur Akninu' anfuut kit. Mes tatuin raan feu' gui in romin, hit tapein fetin ta'ko atoran naan. Fin Uisneno In Asmaan Akninu' es re' an'ator kit! Etun oras ia, hit tmeup teu Uisneno nmees.

Ka'o Musa in atoran naruru' ma nakrira' maufinu re' et hit nekak

⁷ Hit he ta'uab tak saa'? Of oni' hi mitenab am mak, "Atoran re' Uisneno nfee je neu ka'o Musa naan, ansaan!" Kaah fa, tua! Fin karu au ka uhiin fa atoran naan, ka neu fa he au uhiin rasi re' ka namneo ma namnoon fa anbin au nekak. On re' anmui' atoran nak, "Kais amroim he

mait atoni' in baer' ein.” Mes nansaa' am es au bisa uhiin rasi on re' naan ansaan, karu au ka uhiin fa nak, anmui' in atoran? Ka bisa fa, tua![☆] 8 Mes natu'in anmui' atoran nak on re' naan, naan on re' rais maufinu nbin au nekak anmoe' kau he 'roim he 'ait atoni' in bare' huma'-huma'. Karu ka nmui' fa atoran re' antaar, saant ii ka nmui' fa kuasa he n'ator atoni'.

9 Anbi au 'monik amnaa', au ka uhiin ureko' fa sarit na'ko Uisneno In Atoran. A'roo-'roo te, na' au uhiin batuur. Etun au ukeo ma uskeek 'ak, au 'tanhai 'rair Atoran naan ma 'mo'e 'saan. Ma saant ii in upan ma pa'e, es re' au ro he 'maet. 10 Rarit au neek ii krati'-krati', fin au uhiin 'ak, au kuuk ka bisa uraem ok fa 'ok Uisneno nok suma 'moe' utuin In Atoran. Au pantas upein Uisneno In to'os, es re' nhukun na'maet kau, natu'in au 'tanhai In Atoran. Te kaah, anmui' Atoran he nmoe' tuaf bisa nmoin batuur. Mes na'ko au te, Atoran naan es re' nareu' kau he Uisneno nkoit kau. 11 Atoran naan naruru' ma nakrira' raan a'monit re' batuur. Mes natu'in anmui' maufinu re' nmoin et au nekak, au upoi 'aan au tuak ii, ma utenab 'ak, au bisa ureok ok 'ok Uisneno asar au 'moe' utuin In Atoran. Rarit on re' Atoran naan es re' anmoe' tar antea Uisneno nmai'nisin kau, ma ka nroim fa he nkua'noon nok kau.[☆]

12 Onaim karu fe'e na atoni' nak, “Atoran re' Uisneno nfee je neu ka'o Musa naan, ansaan” au utaah am 'ak, “Kaah fa, tua! Uisneno In Atoran naan, kninu!” Ma preent ii ok-oke' nbin Atoran naan, kninu', batuur, ma reko.

13 Of oni' hi mitenab amsa' mak, Atoran naan es re' anmoe' Uisneno nkoit kau. Kaah fa, tua! Fin maski au uhiin Atoran naan, mes au 'neen kuuk piut-piut maufiunt aan 'bi au nekak fe', tar antea au 'moe' sanat. Au 'moe' sanat naan es re' nmoe' Uisneno nkoit kau. Atoorn ii nmees kuun ro reko, fin naan naruru' ma nakrira' rais

☆ 7:7 Anpoin na'kon Pah Masir 20:17, Surat re' Nareta' Nafani' Raan A'honis

5:21 ☆ 7:11 Reta' Ahun-hunut 3:13

maufinu re' nmoe' kit tbaits ok ta'ko Uisneno. Onaim oras Uisneno naruru' ma nakrira' ranan a'monit re' batuur, Atoran naan es re' natoon am nak, rais maufinu re' ambi hit nekak naan, ro ka reko fa, tua.

Rais reko ma rais maufinu nmatita'-roin ein anbin hit nekak nanan

¹⁴ Hit tahiin tak, Atoran re' Uisneno nfee je neu ka'o Musa, nsaun neem na'ko Uisneno In Asmanan. Mes au suma mansian biasa re' neek a'oret. Rarit au 'neen rais maufinu re' et au nekak re'uf, tar antea au 'moe' sanat. Naan on re' saant ii njair au usif, ma au 'jair saant ii in ate.

¹⁵ Au 'keuk. Au ka uhiin fa saa' re' au 'moe' je. Fin au ka 'moe' utuin fa saa' re' au he 'moe' je. Mes au 'moe' utuin saa' re' au ka 'roim fa he 'moe' je. ¹⁶ Karu au 'moe' utuin saa' re' au ka 'roim fa he 'moe' je, au 'manaku' 'ak, Uisneno In Atoran naan, ro batuur. ¹⁷ Onaim au ka es re' a'ator fa au tuak. Mes maufinu re' nmoin et au nekak es re' an'ator au tuak!

¹⁸ Au uhini 'rair 'ak, ka nmui' fa rais reko re' nmoin et au nekak. Fin au re' ia, mansian re' neek re'uf. Reko ka reko, au ka bisa u'seke' fa au tuak ii he 'moe' rais amneot ma ammonot. Au 'roim, mes ka njair fa, tua! ¹⁹ Fin au 'roim he 'moe' rais reko, mes au ka 'moe' je fa. Ma au ka 'roim fa he 'moe' rais maufinu, mes au 'moe' kuuk ee! ²⁰ Karu au 'moe' utuin saa' re' au ka 'roim fa he 'moe' je, naan ka natuin fa au tuak ii kuuk, mes natuin maufinu re' nmoin et au nekak.

²¹ Naan naruru' ma nakrira' preent es, on nai: maski au he 'moe' rais reko, mes anmui' maufinu et au neek ii re' nraban. ²² Te kaah, au neek ii nmariin karu au utenab anmatoom nok Uisneno In Atoran. ²³ Mes on re' nmui' kuasat ambi au nekak re' nareu' kau. Fin au 'roim he 'moe' rais reko, mes ka njair fa. Naan on re' maufinu in kuasa ambi au nekak anheek naan kau, he na'seke' kau he utuin ee. ²⁴ Airoo! Au atoin asusat kau! Sekau es re' bisa nsoi

☆ 7:15 Galatia 5:17

nafetin kau na'ko maufiun gui in kuasan re' nmoin et au nekak, ma nmoe' Uisneno nmai'nisin kau tar antea In nkoit kau?

²⁵ Mes Uisneno kuun neikn On anfei nrair ranan he nafetin kau! Makasi kou'-ko'u neu Ne, natuin hit Usi' Yesus Kristus bisa nsoi nafetin kau! Onaim karu au ufnekan ma 'harap a'bi au tuak, au 'suus. Maski au 'roim he 'moe' utuin Uisneno In Atoorn ein ok-oke', mes anmui' kuasat anbi au nekak re' nfuri' ma nkopo' kau he 'moe' sanat piut.

8

Hit bisa tmoin tamneo ma tamnoon, karu hit tmafuut tok Uisneno In Asmanan

¹ Uisneno ka nhukun fa tuaf re' nmafuut nok Yesus Kristus! ² Fin anmui' prenatal nono' nua re' batuur: ahunut, es re' karu hit tmafuut tok Yesus Kristus, Uisneno In Asmanan nfee kuasa neu kit, he hit bisa tmoin tamneo ma tamnoon. No nuan ii, es re' nmui' maufinu et hit nekak re' nfuri' ma nkopo' kit he tmoe' sanat. Ma karu tmoe' sanat, Uisneno nmai'nisin kit, onaim In nkoit kit. Mes karu hit tapein Uisneno In Asmanan, In nsoi nafetin kit na'ko saant ii In kuasan.

³ Maski hit tmoe' tatuin ka'o Musa in atoran, naan ka bisa nsoi nafetin kit fa na'ko saant ii in kuasan, fin hit suma mansian biasa goah re' tmoe' sanat piut-piut. Mes Uisneno es re' anfei raan a'po'i. Fin In nreek haefan In Aanh aa kuun he njair mansian on re' hit. Maski hit mansian bian atmoe' sanat huma'-huma', mes Nai' Yesus kuun ka nmoe' niit fa sanat saa'-saa'. Saa' antein, In njair fua'-turu' he nsaok nain mansian ii na'ko sin sanat ma penu sin. ⁴ Uisneno nreek haefan Kristus he In nmaet, he hit bisa tmoe' tatuin rasi re' batuur ok-oke' tatuin Uisneno In Atoorn ein. Oras ia, hit tmoe' rais amneot ma ammonot tatuin Uisneno In Asmaan ee In romin, ma ka tmoe' tatuin fa hit roimk ii kuuk attein.

⁵ Atoni' re' nmoin natuin sin roimk ein kuuk, anmoin on re' naan natuin suma nateenb ahaa rais maufinu piut-piut. Mes tuaf re' nmoin natuin Uisneno In Asmaan ee In romin, sin suma nateenb ahaa rasi re' nmoe' Uisneno In Asmaan ee nmariin. ⁶ Atoni' re' nkonan rais maufiun ein he n'ator in neek tenab, on re' atoni' re' ka nneen nahiin fa Uisneno In Asmaan ee, es naan ate in neekn ee nmate nrair neu Uisneno. Mes tuaf re' nkonan Uisneno In Asmaan ee he n'ator in neek tenab naan, in a'monin naan namneo ma namnoon, ma in neekn ee ntainina'.

⁷ Hit mansian ii hit roimk ii kuuk es re' atraban Uisneno In romin. Rarit hit kuuk ka tbaseun fa he tatniin Ee, natuin hit kuuk ka bisa fa. ⁸ Fin tuaf re' nkonan sin roimk ein kuuk he n'ator sin, reko ka reko, ka bisa nharineb fa Uisneno In nekan.

⁹ Mes hi kiim, tuaf re' ka mmoin maufinu fa mituin hi roim ein kiim amtein. Fin karu Uisneno In Asmaan ee nmoin et hi neekm ein, hi mmoe' rasi re' anharineb In nekan. (Mes karu nmui' tuaf re' Kristus In Asmaan ee ka nmoin fa nbi in nekan, in ka njair fa Uisneno lin ja msa'.) ¹⁰ Hi aom ein of anmaten, natuin hi mmoe' sanat un-unu'. Mes natuin Kristus anmoni nbi hi neekm ein naan, hi smaanm ein of anmonin piut, natuin Uisneno nmarak anrair ki, atoin neek amneot ma ammonot, rarit hi mireko mfain mok Ne. ¹¹ Fin Uisneno es re' namonib nafani' Usif Yesus na'ko In a'maten. Onaim maski hit tmaet, karu Uisneno In Asmaan ee nmoni nbi hit nekak, In of anmoe' kit atmoni tfani msa'. In oten nak, In namonib nafani' kit, on re' In namonib nafani' Kristus. ☆

Uisneno In Asmaan Akninu' natoon am nak, hit tjair Uisneno In aanh ein

¹² Aok-bian arki! Hit tmui' tusa!. Naan ka tatuus fa he tmoin tatuin hit mansian ii in romin, mes tatuus he tmoin tatuin Uisneno In romin. ¹³ Fin karu hit tmoin tatuin maufinu re' et hit nekak, Uisneno ro nkoit kit, ma nhukun na'maet kit! Mes karu hit tkonan Uisneno In Asmaan ee

☆ 8:11 1 Korintus 3:16

re' nareu' kuasat na'ko sanat re' et hit nekak nanan, of na' hit bisa tmoin tok amneot ma ammonot tar antea nabarbaar.

¹⁴ Atoni' re' nroim he natniin Uisneno In Asmanan he n'ator sin, sin re' naan, Uisneno In aanh ein. ¹⁵ Karu hit tkonan Uisneno In Asmanan he n'ator kit, In ka nmoe' kit fa he tjair ate re' tmoni tbi mtaus. Unu' fe'e te, hit on re' naan. Mes natuin hit ttoupu trair Uisneno In Asmanan he n'ator kit, hit tahiin tak, hit tjari trair Uisneno In aanh ein. Es naan ate, In of anroim he natniin, karu hit thaman ma tkoa' Ee mtak, "Aam Honi'!"[☆]

¹⁶ Hit neek ii kuuk es re' natoon nak, hit tjair Uisneno In aanh ein. Ma Uisneno In Asmanan natoon on naan amsa'. ¹⁷ Karu hit tjari trair Uisneno In aanh ein, in sairt ii nak, hit of attoup kuuk In pusaak, natuin In njair hit Ama'. Karu Ama' nnona' ma nfee pusaak neu In Anah, es re' Kristus, hit toup tok In pusaak naan amsa'. Mes anmu'i nteni' rais jes: hit ro he tapein susat ma nana'renat on re' Kristus napein susat ma nana'renat amsa', maut he Uisneno na'ratan kit, on re' In na'ratan Kristus.[☆]

Uisneno of antuna' ma na'ratan kit

¹⁸ Mes natuin au teenb ii te, susat ma nana'renat re' hit tapein je oras ia ma'kaaf aah, karu hit tataib ee nok rais ma'tain ein re' Uisneno of naruru' ma nakrira' sin neun kit. ¹⁹ Te kaah, are' saa'-saa' re' Uisneno nmoe' sin nbin neon goe tnanan ma nbin pah-pinan, anpaon ma namnaun, ma nromin he nitan In naruru' ma nakrira' nak, In aanh ein re' batuur ii, esan re' sekau. Fin In nroim he naruru' ma nakrira' In aanh ein re' batuur neu sin nok neek marine. ²⁰ Fin Uisneno nmoe' neno tunan ma pah-pinan, ma in afan-neesn ein ok-oke', he natuin In sarit. Ka njair fa, ka natuin fa sin nroimk ein, mes natuin Uisneno In romin. Fin In nhukun sin ma nkonan sin he

[☆] 8:15 Nai' Markus 14:36, Galatia 4:6 [☆] 8:17 Galatia 4:5-7

sin namre'un nkonon. Maski on naan amsa', mes anmui' rasi fnekan ma harap fe'.[☆] ²¹ Fin oras ia, are' saa'-saa' re' Uisneno nmoe' sin naan, namre'un nrarin, ma ka tiit fa raan a'po'i. Mes Uisneno of nafetin sin, he sin kais namre'un ntein' ein, ma sin bisa npinan ma nakrahan natuin Uisneno In sarit. In ntuna' na'rat-ratan In aanh ein amsa', he sin napenin fetin na'kon rais amreu't ein.

²² Fin hit tahiin tak, anmui' susat ma nana'renat amfaun anbin pah-pinan ia. Na'ko unu' tar antea oras ia, are' saa'-saa' re' Uisneno nmoe' sin naan, nsakoin na'kon menas, oras anpaon he Uisneno na'fe'u sin. Naan on re' bifee ma'apu' re' nsakoi na'ko menas oras anpao he nahoni' naan ri'ana kru'uf. ²³ Ka pah-pinan ia nmees jah fa re' npaon, mes hit tpao on re' naan amsa'. Maski Uisneno nfee In Asmaan ee nahuun neu kit, mes hit tsakoi tbi hit nekak amsa'. Fin hit tpao Uisneno he nait kit atjair In aanh ein, ma nafetin hit aok ii na'ko are' saa'-saa' re' namreu'.[☆]

²⁴ Oras Uisneno nsoi nafetin kit, In natoon amsa', In of anmoe' on mee. Mes oras ia, hit tpao fe', natuin ka njair fa fe'. Karu hit tkius rais jes anjari nrair, hit ka tperluu fa he tpao tteni' he tkius rasi naan. Fin atoni' ka npao nteni' fa he nkius rais jes re' njari nrair, ai'? ²⁵ Mes karu hit tpao he tkius rais jes re' ka njair fa fe', hit bisa taran ma ttahan nok sabaar.

²⁶ On naan amsa' oras hit tpao, Uisneno In Asmaan ee nturun ma nbaab kit amsa', natuin hit ka ta'bei' fa, ma ka t'onen tahiin fa nok batuur. Mes Uisneno In Asmaan ee an'onen ansenu' kit, maski hit suma tahini haa hunu, ma ka t'onen tahiin fa tpaek uab saa'. ²⁷ Uisneno kuun nahiin are' saa'-saa' ii ok-oke' re' hit he ta'uab atbi hit nekak. In nahiin amsa' In Asmaan ee In tenab. Etun In nahiin are' raisn ein ok-oke' re' In Asmaan ee he na'uab he nturun kit. Fin Uisneno In Asmaan ee In tenab, on re' Uisneno

[☆] 8:20 Reta' Ahun-hunut 3:17-19 [☆] 8:23 2 Korintus 5:2-4

kuun In tenab. Ma In Asmaan ee an'onen neu Uisneno, ntoit he Uisneno nturun ma nbaab atoin apirsait ein. Fin In Asmanan naan an'onen natuin Uisneno In romin.

²⁸ Oras ia hit tahiin on nai: Uisneno nmoe' are' saa' ii oke' anjair reko neu tuaf re' anneek Ee. Fin na'ko un-unu' te, Uisneno n'ator nain anmatoom nok In he nmoe' on mee neu sin. Ma In nhaman ma no'en sin am nak, "Iim nai! Iim he mjair Au ngguin nai!" ²⁹ Fin un-unu' te, In nahiin anrair sin, ma npiir naan sin he nmoe' sin on re' In Anah, es re' Kristus. Fin Kristus naan es re' Aan Unu ma re' bian ein anjarin In orif. ³⁰ Tuaf ein re' Uisneno nahiin sin na'ko un-unu', In nhaman ma no'en sin amsa' he njair iin na. Ma tuaf ein re' naan, re' unu' te sin asaant ein, In nmoe' sin anjarin atoin neek amneot ma amnonot re' nareko nfanin nok Ne. In naikas na'ratan sin amsa'.

Uisneno nneek niis kit

³¹ Hit he ta'uab tak saa' attein anmatoom nok rasin re' naan? Uisneno nhoo ma npaumaak kit mates. Onaim karu on naan ate, sekau es re' he nraban kit attein? Ka tiit fa, ai'? ³² Uisneno ka natau fa In Aanh aa kuun. Mes In nnona' ma nfee In Anah naan he nmate njair fua'-turu', he nturun ma nbaab kit ok-oke'. Natuin Uisneno ka natau fa In Anah naan akre'o msa', hit bisa tahiin tak, In of anfee neu kit are' rais reko nok ruum am parsuum. Batauur, ai'?

³³ Of oni' hi mitenab mak, anmui' tuaf re' bisa nasaeb sanat neu tuaf re' Uisneno npiir naan sin. Mes ka tiit fa, ai'? Fin Uisneno kuun es re' nmarak kit nak, atoni' neek amneot ma amnonot re' ka nmui' fa sanat antein, he hit tareko tfain tok Ne.

³⁴ Of oni' hi mitenab mak, anmui' tuaf re' bisa nak Uisneno ro he nfee hukun neu tuaf re' In npiir naan sin. Mes kaah fa, ai'? Fin Yesus Kristus anmaten nrair. Anneis-neisi ntein, Uisneno namonib nafain' Ee na'ko In a'maten. Rarit Uisneno nait Je ma natook Ee nbi bare re' mahormata' nbi In aon-bian a'ne'u. Anbi bare naan In es re' n'onen piut-piut ma nteek kit amsa'.

³⁵ Of oni' hi mitenab mak, anmui' tuaf ai', anmui' rasi re' bisa na'seke' Kristus tar antea In ka nneek antein kit fa heen, ai'? Ka neu fa, tua! Fin maski hit tmui' rasi ai' susat, ai' nana'renat, ai' ka tiit fa mnahat, ai' ka tiit fa pake-nohas, ai' nmui' siraak, ai' tuaf he nroor kit, mes Kristus anneek kit piut. Ka tiit tain fa saa' es, re' bisa nmoe' Je he In kais anneek kit! ³⁶ Anbi Suur Akninu' Uisneno matu'i mnak,

“Atoni' naim ranan he nisan nain ma na'maet kit,
natuin hit tjair Uisneno Iin na.

Sin nmoe' ma ntao kit,

on re' 'bib-kase re' sin he nroro.”[☆]

³⁷ Onaim maski hit tapein susat on mee msa', mes hit tiis atrair, natuin Kristus anneek niis kit!

³⁸ Au uhiin batuur-batuur 'ak on nai: ka tiit fa rais jes amsa' re' bisa nmoe' Uisneno he nasnasab In manekan neu kit. Maski hit tmoin, ai' tmaet, ai' nmui' ameput na'ko sonaf neno tunan, ai' anaa' aprenat, ai' nmui' kuasat, ai' rasi oras ia, ai' rasi re' amnemat, ³⁹ kuasa nbi neon goe tnanan, ai' kuasa nbi pah-pinan, ai' bare' 'teta' re' Uisneno nmoe' sin — ka tiit tain fa saa' es, re' bisa nbatis kit na'ko Uisneno, re' anmoe' Je he In ka nneek kit fa goen! Natuin hit tmafuut tok hit Usi' Yesus Kristus, re' Uisneno anreek haef anrair Je ntaam neem.

9

Uisneno npiir naan atoin Israelas sin

¹ Hit re' tmafuut tok Kristus, ta'uab ate namneo ma namnoon goah. Onaim au ka upoi ki fa. Au nekak nanan ia msa' natoon am nak, Uisneno In Asmanan an'ator au nekak. ²⁻³ Au u'uab on nai: au neek ii nsuus. Au 'naben ate ma'fena' on naan, natuin au umnau au ngguin. Fin

[☆] 8:36 Siit Pures-Bo'is sin 44:23

au 'roim he au uuf ma pah Yahudis* sin imsa' nmafutun nok Kristus, mes amfaun re' ka npirsai Je fa. Karu au bisa 'fei eno' ranan 'eu sin, au ubarab he 'toit Uisneno he nhukun kau, he au 'senu' ma 'seka' sin. Ma au ubarab he 'toti msa' he Uisneno nbatis kau u'ko Kristus, maut he au tuaf ein bisa nmafutun nok Ne. ⁴ Te kaah, sin re' naan atoin Israelas, es re' pah es, re' ma'upan anneis. Uisneno nait inrair sin anjarin In aanh ein na'ko unu'. In naruru' ma nakrira' In kuasa re' mapina'-makraha' neu sin. In nahake' rais manba'an huma'-huma' nok sin. In nfee In atoran neu sin. Sin es re' na'besan nahinin neun Uisneno, ma ntuthae Je. In nba'an he naruru' ma nakrira' In nekan arekot neu sin. ☆ ⁵ Sin na'uuun na'kon hit be'i-na'i sin, esan re': ka'o Abraham, ka'o Isak' ma ka'o Yakop (atoni' nait kanaf 'Isra'el' na'ko Yakop). Ma Kristus re' Uisneno nba'an nain Je na'ko unu' re' he nreek haefn Ee ntaam neem naan, na'uu na'ko hit pah Yahudis sin be'i-na'i sin. Kristus naan amsa', es re' Uisneno re' naprenat nain are' saa'-saa' ii ok-oke'. Onaim pantas karu atoni' naikas ma nboi's Ee tar antea nabar-baar. Batuur on naan, tua! ☆

⁶ Maski atoin Israelas sin amfaun re' ka ntoup fa Kristus fa fe', mes atoni' ka bisa na'uab fa mnak, Uisneno In rais manba'an naan ka njair fa. Kais mak, mansian ii ok-oke' re' na'uu neman na'kon be'i-na'i Isra'el naan, anjair pah Isra'el re' Uisneno npiir je he njair lin ja. ⁷ On re', too mfaun ii na'uu neman na'kon hit be'i-na'i, ka'o Abraham. Mes sin arsin ok-oke' ka ka'o Abraham in sufan-kau'n ein fa re' Uisneno npiir sin. Fin Uisneno natoon anrair ka'o Abraham am nak, "Ho sufam-ka'um re' Au uhiin sin naan,

* 9:2-3 Pah Yahudis naan, on re' pah Isra'el, etun atoin Yahudis re' natua nbi pah Isra'el, ma nbin bare-bare bian amsa'. Mes uuf nai' Yahuda ka huma' mese' fa nok pah Yahudi. Fin uuf nai' Yahuda naan, es re' uuf es na'ko uuf bo'es am nua pah Isra'el. ☆ 9:4 Anpoin na'kon Pah Masir 4:21, 14:22 ☆ 9:5 Reta' Ahun-hunut 32:22-32

suma esan re' na'uu neman na'kon ho anah nai' Isak.”☆

⁸ In oetn ii nak, na'ko unu' tar antea oras ia, ka sufa'-ka'uf sin ok-oke' fa re' na'uu neman na'kon hit atoin Yahudis hit ka'o Abraham, re' njarin Uisneno In aanh ein. Suma sufa'-ka'uf re' na'ko Uisneno In rais manba'an neu ka'o Abraham annees jah, Uisneno nsoi' je njair In aanh ein re' batuur. ⁹ Fin Uisneno nahake' rais manba'an nok ka'o Abraham am nak, “Toon amnemat, of Au 'fain 'uum. Oras naan, ho fee bi Sara' nahoni' naan ri'aan moen jes.”☆

¹⁰ Ka on fa naan ahaa. Fin hit ka'o Isak nok in fee bi Ripka nahoni' naan ri'aan koena'. ¹¹⁻¹² Oras bi Ripka ka nahoni' naan sin fa fe', sin ka nmoe' nitan fa fe' rais reko, ai' rais maufinu. Maski on naan amsa', mes Uisneno natoon nain neu bi Ripka anmatoom nok ri'aan koen re' npoi nahunu mnak, “Taاتف aan of anjair ameput neu in orif.” Uisneno natoon on naan, he naruru' ma nakrira' am nak, karu In npiir naan tuaf es, In nahini nrair nak, In he npaek tuaf naan nahuum on mee. Rarit Uisneno npiir ri'aan muni' naan he njair lin ja. In ka nperluu fa he npao he nkuis ri'aan muni' naan he nmoe' on mee, natuin Uisneno nahiin nain.☆ ¹³ Fin Uisneno na'uab anbi In Suur Akninu' anmatoom nok ri'aan koen naan am nak, “Au 'piir ma 'betis 'aan kuuk nai' Yakop,

mes Au ka 'sium ma 'toup fa nai' Esau.”☆

¹⁴ Onaim hit he ta'uab saa'? Of oni' nmui' tuaf na'uab am nak, “Uisneno nafeek rasi ka natai fa?” Kaah fa, tual

¹⁵ Fin unu' fe'e te, Uisneno natoon neu ka'o Musa mnak, “Au ururu' ma ukrira' Au rais kasian 'eu tuaf re' Au 'piir 'aan kuuk ee.

Au 'fee ma 'nona' Au manekat 'eu tuaf re' Au 'ruur ma 'reek 'aan kuuk ee.”☆

¹⁶ Onaim tuaf naan ka nnaben fa Uisneno In rais kasian, natuin tuaf naan in roimn aa kuun, ai' natuin in a'moe'n

☆ 9:7 Reta' Ahun-hunut 21:12

☆ 9:9 Reta' Ahun-hunut 18:10

☆ 9:11-12 Reta' Ahun-hunut 25:23

☆ 9:13 Nai' Meliaki 1:2-3 ☆ 9:15

Anpoin na'kon Pah Masir 33:19

aa kuun. Mes natuin Uisneno kuun es re' anroim he naruru' ma nakrira' In rais kasian ee neu tuaf naan. ¹⁷ Fin anbi Suur Akninu', Uisneno na'uab neu usif pah Masir am nak, "Au usaeb 'piru'-baru he ho mjair usif, natuin Au he 'paek ko he mururu' ma mukrira' Au kuasat meu too mfaun ein. Nok ranan naan, mansian ii ok-oke' re' nbin pah-pinan ia bisa naikas na'rat-ratan Au kanak." ☆

¹⁸ Onaim karu Uisneno he naruru' ma nakrira' In rais kasian ee neu tuaf es, In nmoe' je goen. Ma karu In nmoe' tuaf es in nekan he naheer on fatu, In nmoe' je goen. ☆

Uisneno bisa naruru' ma nakrira' In rais kasian, mes In ka ntoup fa rais maufinu msa'

¹⁹ Karu nmui' tuaf es, re' nprotees kau mnak, "Karu on naan ate, karu Uisneno he nmoe' rais jes, sekau es re' bisa nraban? Ka tiit fa, ai'? Onaim nansaa' am es In he nasaeb sanat neu kit? Naan ka natai ma namneo fa, tua!"

²⁰ Karu nmui' tuaf re' natenab on naan, au utaa' am 'ak, on nai: "Ho mutenab, mak ho re' ia sekau! Ho he mu'uab amraban Uisneno, ai'?" Kais on naan, tua! Fin anbi Suur Akninu' Uisneno matu'i mnak, "Karu atoni' nmoe' baer es, ka bisa fa bare' naan nataan nafain' ee mnak, 'Nansaa' am es ho nmoe' kau on re' ia?'" ☆ ²¹ On re' amo'e 'na'i. Na'ko auf makri'it akboe's es, in nmui' hak he nmoe' 'huun arimat he atoni' nbo'is. In nmui' hak amsa' anpaek afu kbo'es naan he nmoe' baer porin makrafu', natuin in romin.

²² On naan amsa' Uisneno. In nmui' hak he nmoe' saa'-saa' natuin In romin. In he naruru' ma nakrira' neu mansian ein ok-oke' am nak, In natoo', ma ka ntoup fa 'moe' maufinu saa'-saa' re' atoni' nmoe' je. In nroim he atoni' nahini msa' mnak, In nmui' kuasat kou'-ko'u. Maut he atoni' nahiin on naan, he In naran ma ntahan In tuan nok 'moe' maufinu huma'-huma' re' atoni' nmoe' sin. Mes

☆ 9:17 Anpoin na'kon Pah Masir 9:16 ☆ 9:18 Surat re' Nareta' Nafani'

Raan A'honis 7:7-9 ☆ 9:20 Nai' Yesaya 29:16, 45:9

neu atoni' re' nmoe' maufinu, sin suma npa-paon sin oras he sin namre'un. ²³ In nmoe' on naan, he naruru' ma nakrira' neu too mfaun ein am nak, In he naruru' ma nakrira' In rais kasian neu atoni' fauk aah. Sin re' naan, re' In npiir nain sin he ntuna' na'ratan sin. Ma In nroim he mansian ii nahinin nak, In kuun mapina'-makraha'. ²⁴ Fin hit re' ia, re' In npiir nain kit he tjair lin na. Hit re' ia, bian ta'ko atoin Yahudis, ma bian ta'ko pah bian antein. ²⁵ Unu' te, Uisneno npaek In mafefa kninu' nai' Hosea, he ntui' nmatoom nok ka atoin Yahudis sin fa mnak,

“Anmui' tuaf re' unu' te, ka Au ngguin fa,
mes Au 'haman ma 'o'en sin am 'ak,
‘Hi re' naan, Au ngguin.’

Ma nmui' pah re' unu' te, Au ka 'neek sin fa,
mes Au 'haman ma 'o'en sin am 'ak,
‘Hi re' naan, pah re' Au 'neek.’”[☆]

²⁶ In imsa' ntui' mnak,
“Anbi naan,

nbi bare re' Uisneno natoon anrair sin im nak,
‘Hi re' naan, ka mjair fa Au ngguin!’

Of Uisneno Amonit nroim he natoon neu sin im nak,
‘Oras ia, hi mjair Au aanh ein!’”[☆]

In na'uab on naan, natuin In kasian atoin ka Yahudis sin fa.

²⁷ Mafefa kninu' bian es re' nai' Yesaya, nhunun ma nkoa' niit anmatoom nok pah Isra'el am nak,
“Maski atoin Israelas nabuan anjarin tuunb es,
on re' snaen et tais je ninin,
mes Uisneno of suma nsoi nafetin fauk aah,
na'ko sin sanat ma penu sin.

²⁸ Fin In oras he neem,
he Uisneno nafeek rasi neu tuaf mese'-mese' re' nbin pah-pinan,
on re' In natoon nain.

[☆] 9:25 Nai' Hosea 2:23 [☆] 9:26 Nai' Hosea 1:10

Mes In ka npa-pao fa,
fin In nmoe' sin njair namtiis rabah!”☆

²⁹ Un-unu' te, nai' Yesaya natoon anmatoom nok atoin Yahudis sin im nak,
“Hit tapein upan ma pa'e,
natuin Uisneno Akuasat Anneis-neis,
ankonan he hit sufaf bian sin napenin a'monif.
Fin karu ka on fa naan ate,
hit tamneku trair,
on re' abitan kota Sodom ma kota Gomora sin.”☆

Anmui' Rais Reko neu pah Isra'el re' ka nromin fa he natniin Uisneno

³⁰ Hit he ta'uab saa'? Ta'uab tak, ka atoin Yahudis fa na'ko mee-mee, re' unu' te ka naim nitan fa ranan he naraem ok nok Uisneno, mes oras ia nmarama' nok Ne goen, natuin sin npirsain neun Yesus Kristus. ³¹ Te kaah abitan Isra'el sin, sin nsoba' he nmoe' natuin ka'o Musa in atoran he sin bisa naraem ok nok Uisneno, mes ka njair niit fa msa'.

³²⁻³³ Nansaa' am es sin ka bisa fa he naraem ok nok Uisneno? Natuin sin suma nromin he nmo'en natuin atoran, maut he In ntoup sin on re' atoin neek amneot ma ammonot, mes sin ka npirsain fa neun Yesus Kristus. Rarit on re' sin nastunan nbi “fatu stuna”. Rasi re' ia es re' Suur Akninu' Uisneno In sairt ii nak,
“Amkius iim ma mipeen iim fe'!

Fin Au 'tao 'rair Tuaf es
et a'to'ef Sion, et kota Yerusalem.

Tuaf naan on re' faut goes
re' nmoe' tuaf nastuun.
Mes sekau re' npirsai Je te,
kais namaeb on.”

☆ 9:28 Nai' Yesaya 10:22-23 ☆ 9:29 Nai' Yesaya 1:9

Fatu naan, es re' Nai' Yesus. Mes atoin Israelas sin antorak ma ka ntoup Goe fa. Naan on re' sin nastunan, rarit sin ntaikobin natuin fatu naan. ☆

10

¹ Aok-bian arki! Au he utenab saa' 'eu atoin Israelas sin? Au 'onen he sin nfeen mainuan neun Uisneno he In nsoi nafetin sin na'ko sin saant ein. Karu njair on naan, na' au 'mariin!

² Au bisa utoon anmatoom nok atoin ein ia sin a'moe'k ein: sin nmakoen he natuin Uisneno. Maski sin nmakoen on naan, mes sin ka nahiin fa ranan re' batuur. ³ Natuin sin ka nahinin fa raan a'honis re' batuur, re' nmoe' atoni' bisa nmarama' nok Uisneno, etun sin nasoin ein kuuk ranan he nsoba' he nareok ok nok Ne. Nok ranan naan, sin ka nromin fa he natniin Ee.

⁴ Karu tuaf suma nmoe' natuin ahaa atoran, he Uisneno ntoup goe, naan ka nanokab fa. Etun Kristus nmoe' namtisib atoorn ein ok-oke', maut he hit bisa tmarama' tok Uisneno. Rarit oras ia, ansuun tuaf re' npirsain neun Kristus bisa nmarama' nok Uisneno.

Uisneno nroim he nsoi nafetin are' mansian ii na'ko sin sanat ma penu sin

⁵ Unu' te, ka'o Musa naruru' ma nakrira' nrair ranan anbi Suur Akninu', he tuaf bisa nmarama' nok Uisneno, asar sin nmo'en natuin Uisneno In Atoorn ein ok-oke'. In ntui mnak, "Tuaf re' nmoe' natuin Atoorn ein ok-oke', sin of napenin a'monit amneot ma amnonot." ☆

⁶ Mes Suur Akninu' Uisneno naruru' ma nakrira' ranan bian amsa' am nak, tuaf bisa nmarama' nok Uisneno asar sin npirsain neun Kristus. Matu'i msa' am nak, "Kais mitaan am mak, 'Sekau es re' bisa nsae neu sonaf neno tunan?'" (Naan on re' atoni' nsae natoon neu Kristus am nak, hit mansian ii troim he In ansaun he nsoi nafetin kit.)

☆ 9:32-33 Nai' Yesaya 28:16 ☆ 10:5 A'naak Rais Pirsait ein sin Atoran 18:5

⁷ Matu'i msa' anbi Suur Akninu' mnak, "Kais mitaan am nak, 'Sekau es re' he nsaun neu koon ai abar-barat, anbi bare neu amaets ein?'" (Naan on re' atoni' nsaun he neik nafani' Kristus ansae na'ko In a'maten he nsoi nafetin kit.)

⁸ Kais on naan, tua! Fin anbi Suur Akninu' Uisneno matu'i msa' mnak, "Uisneno In beno et ho humam ma ho matam! Fin beno naan et ho fefam ma ho nekam." Beno naan re' hit tatoon ee neu tuaf am tak, "Karu ho he mupeni 'honis, ho ro he mpirsai meu Kristus!"[☆] ⁹ Karu ho mmanaku' mpaek ho fefam kuum am mak, "Yesus naan, au Usi'," ma ho mpirsai mbi ho nekam mak, Uisneno namonib nafani' Yesus Kristus na'ko In a'maten, es naan ate, Uisneno nsoi nafetin ko msa' na'ko ho sanat ma ho penu sin. ¹⁰ Fin karu ho mpaek ho nekam he mpirsai Kristus, Uisneno nmarak ko nak, atoin neek amneot ma amnonot re' nareko nfain nok Ne. Ma karu ho mpaek ho fefam mak, Nai' Yesus anjair ho Usi', Uisneno nroim he nafetin ko na'ko ho sanat ma ho penu sin kuasat. ¹¹ Anbi Suur Akninu' matu'i mnak, "Atoni' re' npirsai Uisneno, of ka napein fa rais mae, fin Uisneno of he najarib are' saa'-saa' re' In na'uab anrair sin."[☆] ¹² Atoin Yahudis ma ka Yahudis sin fa, huma' mese'. Ka nmui' fa suri. Fin suma nmui' haa Usif mese', ma In njair Usif neu are' kanan pah ma 'pen-pene. In nroim he naruru' ma nakrira' In nekan arekot kou'-ko'u neu tuaf mese'-mese' re' he ntoit Je he In nturun ma nbaab sin. ¹³ Fin anbi Suur Akninu' matu'i mnak, "Are' mansian re' ntoit turun-babat na'ko Uisneno, In of ansoi nafetin sin na'ko sin sanat ma penu sin."[☆]

¹⁴ Mes on mee atoni' bisa ntoit turun-babat, karu atoni' ka npirsai fa tuaf es fa fe'? Ma on mee he sin bisa npirsai neun tuaf naan, karu sin ka nneen niit ee fa fe'? Ma on mee he sin bisa nneen niit ee, karu ka tiit fa tuaf natoon ee neu sin? ¹⁵ On mee tuaf bisa natoon neu sin, karu ka

[☆] 10:8 Surat re' Nareta' Nafani' Raan A'honis 30:12-14 [☆] 10:11 Nai'

Yesaya 28:16 [☆] 10:13 Nai' Joel 2:32

tiit fa tuaf anreek haefan sin he nnao natoon ee on naan? Anbi Suur Akninu' matu'i mnak, "Karu atoni' neem neik rais reko, sin amneemk ein naan, reok re'uf!"[☆]

¹⁶ Mes hi mihini mrari mmak, anmui' atoin Israelas bian re' ka nromin fa he nneen ma natniin Uisneno In Rais Reko. Fin Uisneno In mafefa kninu' nai' Yesaya ntui mnak, "Koi, Usi!"

Sin ka nromin fa he npirsain neun beno,

re' sin nneen ma natniin anrair je na'ko kai!"[☆]

¹⁷ Onaim karu he mpirsai Uisneno, ro he mitniin In Kabin ma Prenat sin fe'. Karu he mneen ma mitniin Uisneno In beon goe te, ro he mneen rasi nmatoom nok Kristus fe'.

¹⁸ Au he utaan 'iit, on nai: of oni' hi mitenab, mak, atoin Israelas sin ka nneen ma natniin niit fa anmatoom nok Kristus, ai'? Sin nnenan anrarin! On re' matu'i nbi Uisneno In Suur Akninu' na'ko unu' mnak,

"Mafefa kninu' Uisneno sin beno re' anmatoom nok Usi' nasiin on ma nabeon on anfuun am nateef anbi pah-pinan;

Sin uabk ein naan,

antea nrair pah-pinan ia in pani-mpain."[☆]

¹⁹ Au he utaan a'tein rais jes am 'ak, "Atoin Israelas sin ka nahinin fa Uisneno In raan ee, oo?" Ka'o Musa, tuaf ahunut re' ntui rasi naan am nak, Uisneno natoon anrair atoin Israelas sin nak,

"Au he 'moe' rais jes,

neu uuf am pah bian sin.

Rasi naan of anmoe' ki ammasmeru'.

Ma Au he 'moe' rais jes amsa',

neu tuaf-tuaf re' hi maan ee amonot on re' ukum.

Rasi naan of anmoe' ki ammarau nisin."[☆]

[☆] 10:15 Nai' Yesaya 52:7 [☆] 10:16 Nai' Yesaya 53:1 [☆] 10:18 Siit

Pures-Bo'is sin 19:5 [☆] 10:19 Surat re' Nareta' Nafani' Raan A'honis 32:21

²⁰ Namuni te, ka'o Yesaya ntui maat-maat anmatoom nok ka atoin Yahudis fa mnak,
 “Anmui' tuaf re' unu' te ka naim niit Kau fa,
 mes sin nateef nok Kau goen.

Anmui' tuaf re' unu' te ka natenab niit fa he nkuis niit Kau,
 mes Au ukriir Ok a'rair 'eu sin.”[☆]

²¹ Mes anmatoom nok atoin Israelas sin, Uisneno na'uab anrari mnak,

“Fai-manas, Au 'fei ma 'pira' Au 'niimk ein,
 he 'pao atoin Israelas sin he neman neu Kau.

Mes sin ka nromin fa he nneen ma natniin Kau,
 ma sin nromin he nranan Kau msa'.”[☆]

11

Uisneno nkasian atoin Israelas sin

¹ Onaim au he utaan on nai: of oni' hi mitenab am mak, “Natuin atoin Israelas sin ka nromin fa he natniin Uisneno, etun In ntorak ma npenan anrair sin.” On naan, aa oo? Kaah fa, tua! Fin au u'uu 'bi sin imsa! Au re' ia, u'ko uuf nai' Benjamin. Nai' Benjamin in aamf ee, es re' nai' Yakop. In nai'f ee, es re' nai' Isak. Nai' Isak in aamf ee, es re' nai' Abraham, re' njair aam uuf neu pah

Isra'el sin ok-oke'.[☆] ² Uisneno ka ntorak niit fa lin na. Sin re' naan, re' In nahiin nain sin na'ko un-unu'. Hi mimnau saa' re' matu'i nain anbi Uisneno In Suur Akninu' anmatoom nok ka'o Elia fe'? In natoon in neek saket neu Uisneno anmatoom nok atoin Israelas sin, onaim in ntoit he Uisneno nhukun sin,³ am nak,

“Koi, Usi! Atoin ein ia, anroor na'maet mafefa kniun' ein, re' Ho mreek haefan sin.

Sin npukai nareu' ma ntuut nakrati' mei fuat amsa',
 anbi bare re' atoni' na'ruri' ma na'bees neu Ko, Usi'.
 Na'ko Uisneno In mafefa kniun' ein ok-oke',
 suma arahaa au 'mees jah re' a'moin fe'.

[☆] 10:20 Nai' Yesaya 65:1 [☆] 10:21 Nai' Yesaya 65:2 [☆] 11:1 Filipi 3:5

Mes sin namin ranan antein,
 he na'maet kau, tua!"[☆]

⁴ Mes Uisneno nataah am nak, "Ho uabm aan, ansaan!
 Fin Au ngguin re' na'ruir ein ma na'besan Kau, sin arsin
 tuaf nifu hiut fe'. Sin naarn ein ma ntaahn ein, ma ka
 na'besan fa neun Ba'all!"[☆]

⁵⁻⁶ On naan amsa', oras ia. Fin ka atoin Yahudis fa ok-
 oke' re' naikoit Uisneno. Anmui' tuaf fe' na'ko hai tuaf ein
 re' Uisneno npiir anrair sin he nsoi nafetin sin, natuin In
 nroim he naruru' ma nakrira' In nekan arekot neu kai, ka
 natuin fa hit tmoe' rais reko! Fin karu In ro he npiir kit
 natuin hit tmoe' rais reko, in sairt ii nak, In ka bisa nafeek
 fa he nakrira' In nekan arekot, ai' In nafeek nak ka nakrira'
 fa In nekan arekot neu kit. Karu on naan, hit ka tteek ee
 fa tak 'nakrira' In nekan arekot' antein.[☆] ⁷ In amsoun
 ii, on nai: too mfaun na'ko atoin Yahudis sin namin he
 Uisneno naruru' ma nakrira' In nekan arekot neu sin, he
 sin bisa nareok ok nok Ne msa'. Mes sin ka napein nitan fa,
 natuin sin neek ein maun ein, ma ka nromin fa he natniin
 Ee. Mes anmui' bian re' napein je. Sin re' naan, es re'
 Uisneno npiir naan sin. ⁸ Anbi Uisneno In Suur Akninu'
 matu'i anmatoom nok a'naak fauts ein fe'e na mnak,
 "Uisneno nfee neu sin,

 mataf re' ka bisa nkisun ma nitan fa,
 rukif re' ka bisa nnenan ma natninan fa,
 ma rone skuma' re' nmoon, ma ka bisa natenab fa.
 Onaim sin ka nahinin fa saa' re' batuur,
 tar antea oras ia msa'."[☆]

⁹ Usif nai' Daut antui nmatoom nok uuf Yahudis anbi
 Uisneno In Suur Akninu' msa' am nak,
 "Maut he sin feest ein anbin sin mei ja kuuk.

 Fin sin feest ee kuuk es re' nakreo nafani' sin,
 he sin natenab nak are' saa' ii reko nrair.

[☆] 11:3 1 Uisf ein sin Reta' 19:10,14 [☆] 11:4 1 Uisf ein sin Reta' 19:18

[☆] 11:5-6 Surat re' Nareta' Nafani' Raan A'honis 7:7-8 [☆] 11:8 Surat re'
 Nareta' Nafani' Raan A'honis 29:4, Nai' Yesaya 29:10

Ma sin a'mui'k ein kuuk es re' anmoe' sin he nastuun am naspaen.

¹⁰ Maut he sin maatk ein ankupun am nameis'okan,
 he sin kais ankius saa'-saa'!
 Maut he sin nroin ma nasahan ma'fen-fena' piut,
 he sin nuif ein ansau'-boko ntein' ein!''☆

Uisneno nroim he nsoi nafetin atoin ka Yahudis fa msa'

¹¹ Au he utaan 'ak on nai: nansaa' am es atoin Yahudis sin nastunan? Sin ntaikobi nrarin, aa oo? Kaah fa, tua! Mes natuin sin ka nromin fa he nneen ma natniin Uisneno, ma ka nromin fa he npirsain neun Kristus, naan anfei ranan neu atoin ka Yahudis fa he Uisneno nsoi nafetin naan sin na'kon sin sanat ma penu sin. Nok ranan naan, Uisneno nroim he atoin Israelas sin natiun Goe, rarit antebin nfanin he natuin Ee ntein. ¹² Mahini' nok akninu' nrair nak, atoin Yahudis sin ntanhai saa' re' batuur. Etun atoni' bian na'ko pah-pinan ia nfuun am nateef nnaben naan Uisneno In nekan arekot. Onaim atoin Yahudis sin, anrukin nmaten. Mes naan anmoe' atoin ka Yahudis sin fa napein upan ma pa'e ko'u. A'roo-'roo te, karu atoin Yahudis sin ok-oke' nareko nfanin nok Uisneno, re' naan reko nneisi ntein!

¹³ Au he utoon 'eu ki re' ka atoin Yahudis fa, on nai: Uisneno nreek haefan kau he 'nao utoon 'eu ki nmatoom nok In Rais Reko. Etun au 'haek ma'tani' he unaob meup reok re'uf ia. ¹⁴ Fin karu au unaob mepu ia nok rek-reko, kais-kaisa' au 'moe' au atoin Yahudis sin natiun atoni' ka Yahudis sin fa, tar antea bian sin napenin fetin na'kon sin sanat ma penu sin. ¹⁵ Oras Uisneno ntorak napoitana In atoin Yahudis sin, re' naan anfei ranan he atoni' bian sin napenin mainuan he sin bisa ntaam anjarin Uisneno lin na. Mes of karu sin nmarama' nok Uisneno, naan reok re'uf. Fin re' naan on re' sin nmoni nfanin na'kon sin a'maetk ein!

☆ 11:10 Siit Pures-Bo'is sin 69:23-24

¹⁶ Tait i'tope' ta'ko tuaf re' nmoe' utunu'. Karu in nait uut a'kre'o he nnona' ma nfee je neu Uisneno, of utunu' naan ok-oke' njair Iin ja re' kninu'. Ma karu tuaf annona' ma nfee hau 'ba'af es njair hau fua toon neu Uisneno, of hau naan a'teme-'teme njair Iin ja kuun re' kninu'.

¹⁷ Au he utaib atoin Yahudis nok hau roet saitun es, ambi po'on. Uisneno nketu nporin anrair in taef bian. Mes hi re' ka atoin Yahudis fa, on re' hau saitun fui. Rarit Uisneno nkeut naan hi taem bian ma npaap ee neu hau re' et poo'n ee nanan. Nok ranan naan, taef na'ko hau fui naan, antoup in a'monit na'ko hau re' et poo'n ee nanan. Naan on re' hi re' ka atoin Yahudis sin fa, mtoup maan amsa' Uisneno In nekan arekot, re' In he nfee je neu In atoin Yahudis sin. ¹⁸ Mes ampaant om, joo! Kais maiks om mak, hi re' mi'ko hau fui naan, reko nneis na'ko taef ein re' Uisneno nketu nporin sin! Karu ho mroim he maikas ho tuam aan, ho kais amnikan, fin ho suma taef mees' aah! Ka ho fa es re' ammoe' he hau naan ma'tani'. Fin hau 'baa'f ii es re' nmoe' he hau naan, ma'tani'.

¹⁹ Of oni' ho he mak, "Uisneno nketu nporin taef mese' naan na'ko hau re' nmoin et poo'n ee nanan, he In bisa npaap nafani' kau 'bi naa, he 'senu' taef amnaa'." ²⁰ Naan batuur. Mes kais amnika' mmak, Uisneno nketu nporin taef ein naan, natuin sin ka npirsain fa neun Kristus. Ma ho msenu' ma mseka' sin, natuin ho mpirsai Je. Onaim kais maiks om! Reko nneis, ho mpaant om ma kais ammoe' tafi'-tafi'! ²¹ Fin atoin Yahudis sin, on re' taef asli re' natoor ma nmoin nahun-huun. Mes Uisneno ka neu fa he nkonan sin antaahn ein a'roo nbi naan. Onaim karu ho ka mpirsai Je fa piut, kais mufnekan ma mharap mak In nroim he nkonan ko mtahan piut ambi naan!

²² Onaim hi ro he mitenab mirek-reko' fe'. Uisneno nmui' neek reko. Mes In bisa nfee hukun ma'fena' msa'. In of anfee hukun neu tuaf re' nmoufu nrair, re' ka nareko nfain fa nok Ne. Mes neu ki re' ka atoin Yahudis ki fa,

Uisneno naruru' ma nakrira' In nekan arekot neu ki, asar hi mmafuut piut ambi Ne, ma mkoon Ee he In nmoe' reko neu ki. Mes karu hi ka mkoon Ee fa on naan, In nketun nporin ki na'ko In roet saitun naan amsa'. ²³ On naan amsa', atoin Yahudis sin. Karu sin nmei' jok na'kon sin saant ein he nmurai npirsain neun Kristus, Uisneno of anpaap nafani' sin neun sin hau roet asli naan. Fin In nmui' kuasa he nmoe' on naan! ²⁴ Fin hi re' ka atoin Yahudis ki fa, on re' taef na'ko hau saitun fui re' unu' te ka nmoin fa nbi poo'n ee nanan. Mes Uisneno npiir naan ki he npaap ki nbi hau roet saitun arekot, re' In nseen ee nbi In po'on, maski hau fui naan anmees kuun a'teta' ma roet abit po'on naan anmees kuun a'teta'. Fin karu ka atoin Yahudis sin fa bisa njarin on naan, saa' antein atoin Yahudis sin. Naan bisa nneisi ntein, karu Uisneno npaap nafani' sin nbin sin roet ee uun.

Atoin Yahudis sin of anmaramae' nfanin nok Uisneno

²⁵ Aok-bian abitan Roma arki! Hi ro he mihiin rasi re' unu' te, ma'nifa'. Fin karu hi mihiin je, hi kais maiks om mak, hi ahinit. Fin on nai: oras ia, atoin Yahudis sin neek ein on fatu, ma ka nromin fa he npirsain neun Kristus. Mes sin of ka on fa naan piut-piut. Fin karu tuaf re' ka atoin Yahudis sin fa ok-oke' re' Uisneno npiir sin npirsain nrarin neun Kristus goen, atoin Yahudis of anpirsain neu Ne msa'. ²⁶ Onaim karu oras naan neem anrair, Uisneno of ansoi nafetin atoin Yahudis sin ok-oke' na'ko sin sanat ma penu in kuasan. Naan on re' matu'i et Suur Akininu' mnak,

“Tuaf es of antaam neem,

re' nsoi nafetin kit na'ko siraak.

In amneman naan na'ko 'to'ef Sion et kota Yerusalem.

In of es re' anmoe' nai' Yakop in sufan-kau'n ein na'pisan.

Fin sin ka nrae ma ntoe Kau fa,

ma sin nkoit Au raan a'honis re' batuur. ☆

27 Au 'roim he 'noes ma 'saok 'ain sin sanat ma penu sin.

Fin Au uhake 'rair rais manba'an 'ok sin on naan." ☆

28 Ansuun oras atoin Yahudis sin nnenan Kristus In Rais Reko, sin nmoe' sin tuak ein on re' musu re' nraabn Ee. Nok ranan naan sin nfeen mainuan neu ki, re' ka atoin Yahudis fa! Maski on naan amsa', mes Uisneno nneek sin fe', natuin In nneek sin be'i-na'i sin, ma npiir naan sin njarin Iin na. 29 Fin karu Uisneno nfee ma nnona' baer es, In ka nait nafain' ee fa. Ma karu In nhaman naan tuaf am nak, "Iim, mituin Kau nai! Iim amtaam amjair Au ngguin nai!" In ka nri'u nporin sin fa ntein.

30 Nahunu te, hi re' ka atoin Yahudis fa, ka mroim fa he mneen ma mitniin Uisneno. Mes oras ia, hi es re' amtoup Uisneno In rais kasian, natuin atoin Yahudis sin re' ka nromin fa he mneen ma natniin Ee. 31 Onaim sin re' naan, es re' oras ia ka nmoe' natuin fa Uisneno In romin. Es naan ate, Uisneno he naruru' ma nakrira' In rais kasian ee neu ki. Ma In of ankasian anteni' sin imsa'. 32 Oras ia, Uisneno nkius atoin Yahudis natai nok atoin ka Yahudis fa. Fin sin ok-oke' ka nmoe' natuin fa In romin, on re' an'o'of naan sin ma ka nitan fa raan a'po'i. In nkonan sin on naan, he In bisa naruru' ma nakrira' In rais kasian neu hit mansian ok-oke'.

Uisneno reok re'uf

33 Uisneno nmanoe ma mahiin ii kah een!

Ma In npaek In mahiin ee he nmoe' rais reko.

Ka tiit fa tuaf es, re' nahiin Je batuur-batuur.

Ka tiit fa tuaf es, re' nahiin ma nakeo batuur-batuur anmatoom nok In rasi tfeka'.

Ka tiit fa tuaf es, re' nahiin ma nakeo,

nansaa' am es Uisneno nmoe' rais jes. ☆

34 Ka tiit fa tuaf es, re' nahiin ma nakeo hit Usi' In tenab.

☆ 11:26 Nai' Yesaya 59:20-21 ☆ 11:27 Nai' Yermias 31:33-34 ☆ 11:33 Nai' Yesaya 55:8

Ka tiit fa tuaf es amsa' re' bisa nfaineek Ee. ☆
 35 Ka tiit fa tuaf es, re' bisa nfee ma nnona' baer es ruum-
 ruum aah neu Uisneno,
 Ka tiit tain fa tuaf es, re' bisa na'seke' Uisneno he
 nbaras nafain' ee. ☆
 36 Fin are' saa'-saa' ii na'uu ma na'baa' nbi Uisneno!
 Are' saa'-saa' ii njarin, natuin In!
 Are' saa'-saa' re' hit tmoe' sin,
 hit tmeup sin teu Ne.
 Hit tanaib Ee, ma tait siit, pures ma bo'is teu Ne,
 tar antea nabar-baar!
 Batuur on naan, tua! ☆

12

Hit a'moink ii njair on mee, karu hit tmafutu tbi Kristus?

¹ Aok-bian manekat arki! Natuin Uisneno naruru' ma nakrira' nrair In rais kasian Ee neu kit, es naan ate au 'toit he hi mnona' ma mfee hi tuam ein a'teme-'teme meu Ne, on re' fua'-turu' re' nmoin fe'. Naan es re' anharineb Uisneno In nekan. Amhaek piut he mmoe' mituin In romin, ma mmoni kninu', fin re' naan naruru' ma nakrira' hi manekam ma hi rais hormaat meu Ne. Ro tebes! Karu hi mi'ruri' ma mi'bees meu Ne on naan ate, reko, tua. ² Kais amkonan mansian pah-pinan oras ia he nreun ki mnak, hi ro he mmoe' saa', ai' mmoe' on mee, ai' mmoin on mee, mituin sin nroimk ein. Kais suma mitun-tuin ahaa sin teenb ein, sin a'moink ein, ai' sin haart ein. Mes reko nneis, hi mkonan Uisneno he na'fe'u hi teenb ein, he hi mitenab are' kanan rasin re' naan mituin raan fe'u. Nok ranan naan, hi bisa mihiin Uisneno In romin neu ki. Fin Uisneno In romin naan, reko, namtiis ma nanokab, ma nharineb In nekan.

³ Natuin Uisneno nreek haefan kau ma nakrira' In nekan arekot neu kau, etun au utoon ki on nai: amtai hi tuam ein ambi raan reko! Kais maiks om anneis na'ko rais

☆ 11:34 Nai' Yesaya 40:13 ☆ 11:35 Nai' Ayup 41:11 ☆ 11:36 1 Korintus

reko ma amneot. Kais ampake 'ta'i re' ka nmui' fa 'sukif. Tuaf-tuaf ro he nahiin in mahinif ma manoef re' Uisneno nfee je neu ne, natuin in npirsai Kristus.

⁴ Tait i'tope' ta'ko aof. Aof ii mese', mes in biaf ein huma'-huma'. Ansuun-suun biaf nok kuun in mepu. ⁵ Hit arkit re' atmafuut mates atbi Kristus, on naan amsa'. Hit arkit amfa-faun, mes hit arkit tmafutu' tjair aof mese'. Ma ansuun-suun tuaf, es-es ate nok in mepu ma banit, on re' aof re' nok in biaf ein. Es anperluu es. On re' a'nimaf re' karu nketu npoirn ee na'ko aof, naan ka mapake' fa goen, ai'?☆

⁶ Au sairt ii on nai: Uisneno nfee kuasa neu kit arkit, he tanaob mepu-banit huma'-huma', natuin In nroim he naruru' ma nakrira' In nekan arekot neu kit. Karu Uisneno nfee kuasa neu ko he m'eut ma mutoon In haanf am beno te, ro he mutoon ee namtiis. Kais munesib.☆ ⁷ Karu Uisneno nfee ko mahinif ma manoef he mtuthae biak ein, ho ro he mpaek kuasa naan he mtuthae. Karu In nfee ko mahinif ma manoef he munoni' biak ein amatoom nok Ne, ho ro he mpaek kuasa naan he munoni'. ⁸ Karu In nfee ko mahinif ma manoef he mu'haba' biak ein ate, ho ro he mpaek kuasa naan he mu'haba'. Karu In nfee ko kuasa he ho bisa mturun ma mbaab biak ein nok a'mu'if re' ho mupein sin ate, amfee ho 'mu'im naan he mturun ma mbaab sin. Karu In nfee ko mahinif ma manoef he mu'naa' biak ein he sin nanaob In mepu nok reko nneis-neisi te, ho ro he mmakoe he mu'naa' ampaek kuasa naan. Karu In nfee ko rais kasian he mturun ma mbaab asuust ein ate, ho ro he mturun ma mbaab sin nok neek marine.☆

Kristus iin na, ro he nmonin on mee?

⁹ Karu hi miruru' ma mikrira' hi manekam meu tuaf, miruru' manekat re' batuur; kais amputa-kriu. Maikoit mi'ko rais maufiun ein, ma mpooh ma mnaa' are' kanan

☆ 12:5 1 Korintus 12:12 ☆ 12:6 Nai' Mateos 24:11,24, 1 Korintus 14:29,
1 Nai' Yohanis 4:1-6 ☆ 12:8 1 Korintus 12:4-11

rais reko. ¹⁰ Hi atoin asraint ein, hi rais manekat naan ro he mipoitn ee mi'ko hi nekam aan'-ana' meu es nok es. Amhaek piut he miruru' ma mikrira' hi rais hormaat meu es nok es. ¹¹ Karu hi mmeup, mmeup batuur-batuur, kaisa' stena'-stena'. Maut he hi neekm ein anmarinan oras hi mmeup. Ma mmeup meu hit Usi'. ¹² Hi neekm ein ro he nmarinan fai-manas, fin hi mihiin Uisneno he nmoe' on mee neu ki. Maran ma mtahan karu mipein susat. Am'onen fai-manas; kais amhae. ¹³ Ampaek hi 'mui'm ein he mturun ma mbaab atoin asranit re' nperluu. Karu nmui' tuaf neem na'ko bare bian ai' bare 'teta', amtoup sin ma mfeen sin bukaet, ai' natua ntaahn ein neun hi umin. Nok ranan naan, hi miruru' ma mikrira' hi maneekm ein meu sin.

¹⁴ Karu nmui' tuaf re' nasusab ki piut, mtoit he Uisneno nmoe' rais reko neu sin. Batuur! Kais amkaas sin, tua! ¹⁵ Karu nmui' tuaf re' neek ee nmariin ate, mmariin mok ne. Ma karu nmui' tuaf re' nkae natuin in neek ee nsuus ate, mkae mok ne. ¹⁶ Ammanek-neek ambi monit nok nekaf mese!. Kais ambeo' gom. Reko nneis, hi mmapartein mok tuaf ein re' ka mapaek ein fa. Kais maikas ho tuam aan he mutenab mak, suma ho mmees muhiin kuum. [☆]

¹⁷ Karu tuaf anmoe' maufinu neu ko, ho kais ambaras nok maufinu. Mes ho ro he msoba' maim raan reko nneis, re' tuaf-tuaf ein ok-oke' bisa ntoup goe. ¹⁸ Karu reko te, maim ranan he mmoni mbi mamut ma rame' mok tuaf-tuaf ein ok-oke'.

¹⁹ Aok-bian manekat arki! Kais ambaras maufinu nok maufinu. Maut he Uisneno es re' n'ator. Fin In natoo' karu atoni' nmoe' maufinu, on re' matu'i anbi Suur Akninu' mnak,
 “Hit Usi' es re' neikn On na'uab am nak,
 Au es re' a'mui hak he 'baras rais maufiunt ein.

[☆] 12:14 Nai' Mateos 5:44, Nai' Lukas 6:28 [☆] 12:16 Fainekat 3:7

Fin Au es re' a'fee hukun 'eu tuaf re' anmo'en rais maufinu.”[☆]

²⁰ Reko nneis ammoe' mituin saa' re' Suur Akininu' natoon nain je na'ko unu' mnak,

“Karu ho muus goe namnaah,
mfee ne mnahat.

Karu ho muus goe nmeon oe,
mfee ne oe.

Fin karu ho mmoe' on naan, in of namaeb on,
ma nhormaat ko.”^{* ☆}

²¹ Kais amkonan rais maufiun ein he n'ator ko. Reko nneis rais reokn ein es re' an'ator ko. Nok ranan naan, ho bisa miis maan rais maufiun ein.

13

Amneen ma mitniin meu tuaf ein re' anna'an aprenat

¹ Ansuun tuaf ro he nneen ma natniin anaa' apreent ein. Fin sin nmu'in hak ma kuasa he napreent ein. Mes sin nnaa' kuasa naan, natuin Uisneno es re' annona' ma nfeen sin. Anmui' anaa' kuasa oras ia, natuin Uisneno es re' nanaib sin. ² Onaim karu tuaf anraban anaa' apreent ein on re' naan, naan on re' sin naban saa' re' Uisneno nanaib anrari. Karu sin nmo'en on re' naan, of napeenin hukun na'ko Uisneno.

³ Karu hi mmoe' reko, kais mimtaus anaa' apreent ein. Mes karu hi mmoe' maufinu, reko nneis hi mimtausan sin! Onaim ampaant om he mmoe' reko, he kais mimtausan sin. Ma karu hi mmoe' on naan, sin of anbo'is ki. ⁴ Fin anaa' apreent ein, sin re' naan es re' Uisneno npiir ma nanaib naan sin he ntuthae ki. Mes karu hi mmoe' sanat piut, reko nneis hi mpaant om reko! Fin sin re'

[☆] 12:19 Surat re' Nareta' Nafani' Raan A'honis 32:35 ^{*} 12:20 Suur Akininu' uab Yunani ntui mnak, “on re' nateek ai fraa' anbi in a'nakan.” Ahiint ein anbin Suur Akininu' nak, naan in a'moufn ii, “in namaeb on ma anhormaat ko.” [☆] 12:20 Siit Pures-Bo'is sin 140:10, Fainekat 25:21-22

naan, anmu'in hak he nhukun ki. Hak naan ka ruum am parsuum fa. Sin re' naan, on re' Uisneno In aan reun ein re' nfee hukun neun tuaf ein re' nmo'en maufinu. Fin Uisneno ka ntoup fa rais maufinu re' atoni' nmoe' je; In natoo' neu sin.

⁵ Es naan ate, hi ro he mneen ma mitniin anaa' apreent ein. Fin hi mihiin ambi hi neekm ein am mak, naan es re' batuur. Ma hi mihiin amsa' mak, Uisneno natoo' karu hit ka tmoe' fa rais reko.

⁶ On naan amsa', hi ro he mbaen beo re' natuin atoran aprenat, natuin anaa' apreent ein nanaob Uisneno In mepu. ⁷ Onaim hi ro he mbaen are' saa'-saa' mituin atoran re' batuur. Ambaen re' ahoik beon guin, are' kanan beo ngguin re' hi ro he mbaen sin. Amfee hormaat meu tuaf ein re' ro he thormaat sin. Ma karu nmui' tuaf re' nmoe' rais reko piut, minaib sin kaank ein he are' tuaf amfaun nahinin nak, sin nmo'en rais reko. ☆

Atmaneek es nok es anbi 'monit

⁸ Ambaen mufeeek ho tuus ein, he kais ammoni mbi tusa'. Fin hit suma he tatuus atbi rasi mees' aah, es re' atmaneek. Karu hi mneek hi aom-bian ate, hi mmoe' mituin amrair Uisneno In Atoorn ein. ⁹ Fin Atoorn ein naan nak, "Kais ammakek; kais amroor ma mi'maet mansian; kais mibaak; kais mikoman es in bare'," ma bian antein. Karu he mmoe' mituin Atoorn ein ok-oke', hi ro he mmoe' mituin Atoran mese' re' ia, "Ho ro he mneek ho aom-bian, namnees on re' ho mneek ho tuam aan kuum." ☆ ¹⁰ Fin karu hit taruru' ma takrira' hit manekak teu tuaf bian, hit ka tmoe' fa maufinu teu ne, ai'? Onaim karu hit taruru' ma takrira' hit manekak piut, hit bisa tmoe' tatuin Atoorn ein ok-oke' na'kon Uisneno.

☆ 13:7 Nai' Mateos 22:21, Nai' Markus 12:17, Nai' Lukas 20:25 ☆ 13:9 Anpoin na'kon Pah Masir 20:13-15,17, Surat re' Nareta' Nafani' Raan A'honis 5:17-19,21, A'naak Rais Pirsait ein sin Atoran 19:18, Nai' Mateos 22:39, Nai' Markus 12:29-31

Ka 'roo fa nteni' te, Kristus he nkoen On anfaïn neem

¹¹ Uisneno he nafeti' kit na'ko maufinut anbi pah-pinan ia. Ma oras ia, in oors ee he nsoi nafetin are' mansian ii ok-oke', anpaumaak anneis na'ko oras hit he tpirsai fe' teu Yesus Kristus. Es naan ate, hit ro he tmaneeek es nok es atbi 'monit, natuin hit tahiin rasi naan. Naan on re' unu' te, hit ttuup. Mes oras ia, in oors ee re' hit he tfeen nai! ¹² Ka 'roo fa te, he nmeu goen ma maans ee he nsae jen. Onaim reko nneis hit tasnaas nai ta'ko hit maufinun. Naan, on re' atoni' re' nmoni nbi meis'okan ma nmoe' rais maufinu, fin sin nateenb ein nak, ka tiit fa tuaf re' nkius niit sin. Mes oras ia, hit ro he tjair on re' sorarus re' npaek baer makenat, he nahake' rais reko, on re' atoni' nmoni nbi me'u. ¹³ Hit ro he tmoin reko, he are' tuaf amfaun ankius niit kit nak, hit tmoe' rais reko. Ka reko fa karu hit suma tmoe' fesat ma tbukae kuuk mafu. Ka reko fa karu hit ta'hakek. Ka reko fa karu hit tmatoe re'uf ma tmatoe es nok es. Ma ka reko fa karu hit tatiun ma tsaek natuin tuaf he nneis kit. ¹⁴ Mes reko nneis, hi mi'bani' hi neekm ein he mjair huma mese' on re' hit Usi' Yesus Kristus, re' Uisneno nreek Ee neem. Ma karu ho mroim he mmoe' rasi re' ka batuur fa, kais amkonan he ho mmoe' mutuin ho romim rafu'-rafu' on re' naan. Maran ma mtahan ho tuam aan, tua!

14

Kais amkaritik rafu'-rafu' meu hi aom-bian atoin asranit

¹ Anmui' tuaf re' anpirsai nrair neu Uisneno, mes in rais pirsait ee ka naheer fa fe', ma in ka nahiin fa rasi mfaun fa fe'. Amtoup goe nok reko. Kais ammatoe nmatoom nok in penit. Maut he in nmapartein nok ki. ² Anmui' tuaf re' anpirsai neu Uisneno, re' natenab am nak, atoin asranit bisa nbukae saa'-saa' aah, on re' sisi, ai' saa'-saa'. Mes anmui' atoin asranit bian, re' sin rais pirsait ee ka naheer fa, re' suma neukn ahaa utan. Fin sin nanunin sisi. ³ Mes amneen, oo! Atoin asranit re' nnaben ate in bisa neuk saa'

aah, kais mismeru' atoni' re' ka neuk fa sisi. On naan amsa' atoin asranit re' ka neuk fa sisi, kais mitoon meu atoni' re' neuk sisi mmak, "Hae! Meuk sisi te, nsaan!" Natuin Uisneno ntoup sin nua sin he njarin Iin na!

⁴ Karu amkaritik ho aom-bian atoin apirsait on naan, ho mak, ho sekau ko! Ho mmui' hak saa' he musaan biak ein? In ka ho ameupt aa fa! Ma ho re' naan, ka in a'naakf aa fa. Fin suma in A'naakf aa kuun, es re' nmui' hak he natoon maat-maat nak, re' in mmoe' je naan, batuur, ai' ansaan. Mes kais amnikan. In A'naakf ee, of antoup atoni' naan nok reko, natuin in A'naakf ee nha'tain je he in bisa naran ma ntahan.

⁵ Anmui' tuaf bian nafekan am nak, neon goes reko nneis na'ko neno bian sin. Anmui' tuaf bian natenab am nak, neon ein ok-oke' huma' mese'. Tuaf-tuaf ro he nafeek kuun anmatoom nok rasi naan. ⁶ Karu atoni' re' natenab nak, anmui' neno re' reko nneis na'ko neno bian sin, in nmoe' on naan he naruru' ma nakrira' in rais hormaat neu hit A'nakaf. Atoni' re' neuk sisi ma mnahat bian sin, bisa neuk ma naah he naruru' ma nakrira' in rais hormaat neu hit A'nakaf, fin in ntoit makasi neu Uisneno. On naan amsa' neu atoni' re' ka neuk fa sisi. In he naruru' ma nakrira' in rais hormaat neu hit A'nakaf amsa', ma in ntoit makasi neu Uisneno msa'. ☆

⁷ Oras hit tmoin, hit ka tmoin fa neu hit tuak ii kuuk. Ma oras hit tmaet, hit ka tmaet fa neu hit tuak ii kuuk. ⁸ Fin karu hit tmoin fe', hit tmafuut fe' tok hit Usi'. On naan amsa' karu hit tmaet, hit tmafuut fe' tok hit Usi'. Onaim maski hit tmoin, ai' atmaet, hit atjair Iin na fe'. ⁹ Es naan ate Kristus anmaet, rarit anmoni nfain. In nmoe' on naan he In bisa njair Usif neu amaets ein, ma neu tuaf-tuaf re' anmonin fe'e msa'.

¹⁰ Onaim nansaa' am es ho munaib ho tuam aan on re' afeek rasi, he mkaritik ho aom-bian asraint ein? Nansaa' am es ho musmeru' sin? Fin hit arkit ok-oke' ro he tbaisenu t'ain Uisneno, he In naprikas hit i'moink ii

☆ 14:6 Kolose 2:16

mese'-mese'.[☆] 11 Matu'i na'ko unu' anbi Suur Akinu'
 Uisneno mnak,
 “Hit Usi' kuun es neikn On natoon am nak,
 ‘Mansian ii ok-oke' of na'ruir ein ma nri'tuun he na'besan
 Kau,
 ma nakriir ein rais hormaat neu Kau.
 Tuaf mese'-mese' of anpaek sin feefk ein he n'au ma
 nmanauk ein,
 am nak, Au 'jair sin Usif,
 natuin Au re' ia, Uisneno.’”[☆]

¹² Onaim hit arkit ok-oke' ro tataah ma tasaah he tatoon
 teu Uisneno tak, hit tmoe' on mee, ma nansaa' am es hit
 tmoe' on naan.

Kais mumouf ho aom-bian atoin asranit

¹³ Unu' te, hi abitan Roma misaeb sanat meu hi aom-
 bian atoin asraint ein. Misnaas nai! Reko nneis, hit tafeek
 on nai: hit kais atmo'e' he hit aok-bian ii, nastuun. Hit kais
 takreo tamouf sin he sin nmo'en sanat.

¹⁴ Natuin au 'mafuut 'ok hit Usi' Yesus, au uhiin batuur
 on nai: ka tiit fa rasi mese' re' bisa n'oemetab atoni' msa',
 tar antea in ka bisa n'onen antein fa neu Uisneno. Mes
 karu tuaf es natenab nak, baer es an'oemeetb ee, tar antea
 in nnaben ate in ka nmui' fa hak he n'onen antein, maut
 he bare' naan anjair baer nuni neu ne. ¹⁵ On re' karu ho
 meuk sisi, ma rasi naan anmoe' ho aom-bian neekn ee
 nsuus, ho ka mururu' ma mukrira' fa ho manekam meu
 ne, ai'? Maran ma mtahan ho tuam aan! Kais mureu'
 ho aom-bian, natuin suma he mbukae kuum saa' es! Fin
 Kristus anmaet neu tuaf naan amsa'. ¹⁶ Ka reko fa karu
 ho mmoe' rais jes, re' ho maan ee neu reko, mes tuaf bian
 na'uab na're'uf ho kaanm aan, natuin sin naan ho 'mo'em
 naan, maufinu.

¹⁷ Mutenab murek-reko! Fin Uisneno, hit Usif. Mes hit
 ka tjair fa Uisf ee iin na natuin hit suma taah-tiun tatuin
 atoorn ahaa. Kaah fa, tua! Karu hit troim he tjair Uisf ee

[☆] 14:10 2 Korintus 5:10 [☆] 14:11 Nai' Yesaya 45:23

lin na, hit ro he tmoe' reko, hit neek ii kninu', hit tmoin tamneo he tmarama' es nok es, ma hit neek ii nmariin. Rasin re' ia ok-oke' bisa njarin, karu hit tmafuut piut tok Uisneno In Asmaan Akninu'. ¹⁸ Tuaf re' ntuthae Kristus on re' naan, anharineb Uisneno In nekan. Ma tuaf bian anparikas narek-reko' tuaf naan in a'monin, rarit naikas tuaf naan in kanan am nak, "In re' naan, atoin reko!"

¹⁹ Onaim hit ro he thaek piut he tmoni ma tmarama' es nok es, ma tmaha'tanin es nok es. ²⁰ Kais mireu' Uisneno In mepu nbi tuaf bian in a'monin, suma natuin rasi re' nmatoom nok bukaet. Uisneno nfee mainuan he hit tbukae saa'-saa' aah, fin bukaet ein naan nakniun' ein ok-oke'. Mes karu ho mmaka'rasi' mok ho aom-bian anmatoom nok rais bukaet, ho msaan. Kais on naan, tua!

²¹ Reko nneis maran ma mtahan ho tuam aan. Kais meuk sisi, ai' miun tua min-kase, ai' mbukae saa' es, re' nmoe' ho aom-bian aan anmouf. ²² Au sairt ii on nai: karu ho m'aa' nefak mok Uisneno, rarit ho mufeek am mak, ho mroim he mpirsai Je nmatoom nok bukaet, ho mupein upa' ma pa'e, fin rasi naan beres anrair. Kais mutenab mak, ho mmo'e msaan, ai' kaah. Fin ho mufeek amrair on naan ate. ²³ Mes karu ho neekm aan na'oni', rarit ho meuk saa' es, re' ho mnaben ate ho m'oemetab ho tuam aan, Uisneno nasaan ko, natuin ho ka mutuin fa saa' re' ho mpirsai je mbi ho nekam oras ho mbukae. Fin karu ho he mmoe' saa' aah, mes ho mpirsai mmak, naan ansaan anbi Uisneno In human ma In matan, naan ansaan anrair.

15

Am'usaha he mturun tuaf bian he sin npirsain ma'tani' nneis

¹ Hit re' atpirsai ma'tani', ro he tmui' neek mainuan he tturun ma tbaab tuaf re' ka na'bei' fa, he sin naarn ein ma ntaahn ein nbin susat. Ka reko fa karu hit suma tharineb hit tuak ii kuuk. ² Au sairt ii on nai: hit es-es ate, ro he t'usaha he tmoe' rais reko teu hit aok-bian asraint ein, maut he sin rais pirsait naan na'kii' ma naheer

antein. Nok ranan naan, sin nmarinan natuin hit a'moe'k ein. ³ Fin Yesus Kristus kuun ka nmoe' fa In meup goe he suma nhariinb ahaa In nekan, mes In nharineb Uisneno In nekan amsa'. Naan on re' matu'i nain anbi Suur Akninu' Uisneno nmatoom nok saa' re' of anjair neu Nai' Yesus am nak,

“Sin rais ma'munu' ma man'akan neu Ko,
nmouf ma nsae ntoom Kau msa'.”☆

⁴ Are' saa'-saa' ein re' unu' te tuaf antui sin anbin Uisneno In Suur Akniun' ein, antui sin he nanoni' kit. In naruru' ma nakrira' neu kit ranan he na'be'ib kit attein, taran ma ttahan piut, ma In Kabin ma Prenat sin imsa' nfee rais ma'haba' neu kit. Nok ranan naan hit bisa tpa-pao he tkius Uisneno naruru' ma nakrira' In nekan arekot neu kit.

⁵ Uisneno es re' anha'tain Iin na he bisa naarn ein ma ntaahn ein anbin susat ma nana'renat. Ma In es re' anha'tain hit neek ii msa'. Au 'onen he 'toit Je, he In naruru' ma nakrira' ranan, he hi bisa mmoin nekaf mese', mituin Yesus Kristus In romin. ⁶ Fin karu hi nekaf mese' on naan, hi bisa mibua he maikas ma mbo'is Uisneno. In re' naan, hit Usi' Yesus Kristus In Amaf.

Uisneno In Rais Reko neu atoin Yahudis ma ka Yahudis fa msa'

⁷ Onaim hi ro he mmatoup es nok es, on re' Kristus antoup ki. Fin karu hi mmoin on naan, of mansian ii naikas na'rat-ratan Uisneno In kanan. ⁸ Au utoon 'eu ki on nai: Kristus anmoe' Jon on re' aan renu'-aan reka' he nturun ma nbaab atoin Yahudis sin he nahinin nak, Uisneno na'uab batuur. Ma Kristus anmoe' Jon on re' aan renu'-aan reka' he nanokab ma namtisib are' kanan rasi re' Uisneno nba'an he nmoe' sin neu hit be'i-na'i sin imsa'. ⁹ Nok ranan naan, are' pah bian re' ka Yahudis fa, naikas

☆ 15:3 Siit Pures-Bo'is sin 69:8

ma nbo'is Uisneno. Fin sin nahinin nak, In nkasian kit ok-oke'. Naan on re' ka'o Daut antui nain je na'ko unu' nbi Suur Akninu' mnak,

“Es naan ate au he 'aikas u'rat-ratan Ho kaanm aan,
'eu uuf am pah bian sin, tua.

Au he 'sii siit pures ma bo'is 'eu Ko,

'bi pah bian sin huumk ein ma sin maatk ein, tua.”☆

¹⁰ Matu'i nbi bare bian antein et Suur Akninu' msa' mnak,

“Hi atoin sona' ma 'teta' mi'ko bare 'teet ein.

Amharineb hi neekm ein naan nai,

mibu-bua mok Uisneno Iin na kuun.”☆

¹¹ Anbi bare bian anteni' anbi Suur Akninu', ka'o Daut antui mnak,

“Hi re' mi'ko uuf am pah bian,

annao he mitoon meu mansian ii ok-oke' anmatoom nok Uisneno In pinan ma krahan,

he sin npures ma nbo'is hit Usi' msa'.”☆

¹² Anbi bare bian anteni' anbi Suur Akninu', ka'o Yesaya ntui mnak,

“Na'ko nai' Isai in anah, usif nai' Daut,

of anpoi ma nboor neem anbi in sufan ma ka'un tuaf es.

In of es re' annaa' aprenat neu uuf ma pah bian sin.

Sin nahini nrarin neu In he nkoen On neem.

Rarit sin anpa-pao Goe,

fin sin nahinin nak, In re' naan, sekau.”☆

¹³ Saa'-saa' re' hit tafnekan ma tharap sin ok-oke', na'uu ma na'baa' na'kon Uisneno. Karu hi mpirsai Je, In es re' anmoe' hi neekm ein anmarinan ma ntainiin ein. Maut he Asmaan Akninu' Uisneno In kuasan, anmoe' ki he mpirsai ma mi'kii' anmatoom nok saa' re' In nmo'e.

☆ 15:9 2 Nai' Samuel 22:50, Siit Pures-Bo'is sin 18:50 ☆ 15:10 Surat re' Nareta' Nafani' Raan A'honis 32:43 ☆ 15:11 Siit Pures-Bo'is sin 117:1

☆ 15:12 Nai' Yesaya 11:10

Uisneno nhaef nai' Paulus he nnao natoon In Rais Reko

¹⁴ Aok-bian arki! Au 'pirsai 'ak, hi neekm ein naheun nok rais rekon, hi mihini mfa-faun, ma hi bisa mmafainekan es nok es. ¹⁵ Au 'tui maat-maat 'bi surat re' ia, he utoon ki no goes anteni' anmatoom nok rasi huma'-huma'. Au 'tui on nai, natuain Uisneno naruru' ma nakrira' In nekan arekot neu kau, ¹⁶ oras In nait kau 'jair Yesus Kristus In haef he 'nao utoon Uisneno In Rais Reko 'eu ka atoin Yahudis sin fa. Au unaob au mepu naan on re' a'naak rais pirsait es, re' nabarab too mfaun ein anjair fua'-tuur es, re' nharineb Uisneno In nekan. Fin Uisneno In Asmaan Akninu' nakninu' sin, he Uisneno bisa ntoup sin.

¹⁷ Natuain au 'mafuut 'ok Yesus Kristus, etun au bisa u'aiti' au humak a'bi Uisneno In human ma In matan. ¹⁸ Au ka ubrain fa he u'uab rasi 'teta'. Au suma ureta' Kristus In meupn ahaa, ma on mee m'es na' In npaek kau. Oras ia nmui' atoin ka Yahudis fa re' nneen ma natniin Kristus, natuain Uisneno npaek kau, he ururu' ma ukrira' ranan a'paek au uab ein ma au 'meupk ein. ¹⁹ Kristus anfee kau kuasa na'ko Uisneno In Asmaan Akninu', he au bisa 'moe' rais sanmakat huma'-huma'. In nfee kau kuasa naan he naruru' ma nakrira' mnak, Kristus re' naan, sekau. Nok ranan naan, au utoon a'rair tuaf-tuaf nbi mee-mee, are' saa' ii ok-oke' nmatoom nok Kristus in Rais Reko. Es naan ate, au utoon u'ko kota Yerusalem, anfuun am nateef tar antea pah Ilirikum anpaumaak pah Itali. ²⁰ Na'ko un-unu' te, au utenab 'ak, "Au umnau he utoon anmatoom nok Kristus 'eu tuaf re' ka nneen ma natniin niit fa In Rais Reko!" Fin au ka 'roim fa he unoni' 'bi bare re' atoni' bian sin nanoni' nrari nbin bare naan. ²¹ Anbi Suur Akninu' Uisneno matu'i mnak,

"Uuf am pah re' ka nneen ma natniin niit fa nmatoom nok Uisneno,
sin re' naan, of es re' niit Ee.

Atoni' re' ka nneen ma natniin niit fa saa'-saa',

sin re' naan, of es re' nahini ntoom, anmatoom nok Ne."☆

Nai' Paulus anruun oras he nnao neu kota Roma

²² Natu'in au 'meup gui on naan, etun es na' au ka 'eiti 'kious 'iit ki fa fe'.☆ ²³ Mes oras ia, au urair 'mepu 'bi ia. Ma au urair toon-toon au umnau he 'eiti 'kious ki. ²⁴ Karu au 'nao 'eu pah Spanyol, au he 'eisi 'kious ki. Rarit karu au 'eisi 'tahan 'bi naan, hi bisa mturun ma mbaab kau nok noni-roit he 'nao 'eu Spanyol.

²⁵ Mes oras ia, au he 'nao 'eu Yerusalem fe', he 'tuthae Uisneno Iin na nbi naan. ²⁶ Fin hit aok-bian sin etan propinsi Makedonia ma propinsi Akaya nfee nrarin roi kolekte he nturun ma nbaab atoin kasian sin re' npirsain neun Kristus etan Yerusalem.☆ ²⁷ Sin he nmo'en on naan, natu'in sin nnaben ate sin nmu'in tusa' neun hit aok-bian sin abitan Yerusalem. Fin atoni' na'ko pah bian sin nbin mee-mee msa', antoup rais reko re' Uisneno In Asmaan ee nfee neu atoin Yahudis sin fe'. Es naan ate, reko karu atoin asranit re' ka Yahudis sin fa npaek sin a'mui'k ein he nturun ma nbaab sin aok-bian atoin Yahudis sin.☆

²⁸ Onaim karu au 'meup urair mepu ia, he 'fee roi kolekte ia 'eu hit aok-bian abitan Yerusalem, au he 'eisi 'kious ki oras au he 'nao 'eu Spanyol. ²⁹ Karu au 'uum, au 'eik tetus-athoen na'ko Kristus.

³⁰ Aok-bian arki! Natu'in Yesus Kristus anjair hi Usi', ma natu'in Uisneno In Asmanan anmoe' ki ma mmaneek es nok es, es naan ate au 'toit he hi m'onen batuur-batuur he Uisneno nturun ma nbaab kau. ³¹ Amtoit he Uisneno npafa' ma npanat kau 'bi propinsi Yudea, he atoni' re' ka npirsai fa Uisneno kais anmoe' maufinu neu kau. Ma mtoit he karu au 'nao 'tuthae atoin asranit abitan Yerusalem ate, sin ntoup kau nok reko. ³² Rarit karu tatuin

☆ 15:21 Nai' Yesaya 52:15 ☆ 15:22 Roma 1:13 ☆ 15:26 1 Korintus 16:1-4 ☆ 15:27 1 Korintus 9:11

Uisneno In romin, au bisa 'uum a'kius ki nok neek marine. Au he usnaas akre'o 'bi naan. ³³ Au 'onen ma 'toit he Uisneno nok ki. Fin In es re' bisa nmoe' atoni' he nmoni nbi rais rame' es nok es. Batuur on naan, tua!

16

Nai' Paulus ansonu' haan tabes ma haan buseet neu aok-bian sin abitan Roma

¹ Anbi surat re' ia, au he 'teek ma utoon ki bi Febi 'eu ki, ma 'toit he hi mtoup goe. In es re' sin nait je he na'naak neu jema'at et kota Kengkrea. ² Au 'toit he hi mtoup goe nok reko, on re' hit atoin asranit kit atmatoup es nok es, natuin in nmafuut nok hit Usi'. In nperluu saa' ate, mturun ma mbaab ee. Fin in es re' anturun ma nbaab kau ma too mfaun ein na'ko unu'.

³ Haan tabes ma haan buseet neu ain Priskila* ma in mone aam Akila. Hai minaob miit Yesus Kristus In mepu mfaun mibu-bua.✠ ⁴ Sin nua sin he noi nmaten he nafetin kau na'ko siraak. Mes ka au 'mees fa re' a'toit makasi 'eu sin. Fin ka atoin Yahudis fa re' njair atoin asranit na'ko jema'at anbi mee-mee, antotin makasi msa' natuin sin anmo'en rais reko.

⁵ Au 'sonu' haan tabes ma haan buseet 'eu too mfaun ein re' nabuan ma nakrein nbin ain Priskila ma aam Akila sin umi'.

Haan tabes ma haan buseet 'eu au partei, nai' Epene-tus. In re' naan, tuaf ahunut re' npirsai neu Kristus anbi propinsi Asia.

⁶ Haan tabes ma haan buseet 'eu bi Mia. In nmeup ma'tani' nbi hi sonam ma hi tnaanm ein.

* 16:3 Suur Akinu' uab Yunani ntui mnak, "Priska". Priska ma Priskila naan, kanaf mese'. ✠ 16:3 Haef ein sin Reta' 18:2

⁷ Haan tabes ma haan buseet 'eu aam Andronikus ma ain Yunia.[†] Sin re' naan, atoin Yahudis on re' au. Sin npirsai nrarin neun Kristus oras au ka 'pirsai fa fe'. Unu' te, sin nbin bui je nanan nabuan nok kau. Sin njarin Uisneno In haef ein, ma too mfaun ein nahiin sin.

⁸ Haan tabes ma haan buseet 'eu nai' Ampliatus. Au 'neek ee, natuin in nmafuuat nok hit Usi'.

⁹ Haan tabes ma haan buseet 'eu nai' Urbanus. In nanaob Kristus In meup goe msa' nabu-bua nok kai.

Haan tabes ma haan buseet 'eu nai' Stakis, re' au 'neek.

¹⁰ Haan tabes ma haan buseet 'eu nai' Apeles. In nasoin naan on na'ko kreot. Batuur een, in npirsai nrair neu Kristus.

Haan tabes ma haan buseet 'eu nai' Aristobulus in nonot-asar sin ok-oke'.

¹¹ Haan tabes ma haan buseet 'eu nai' Herodian. In atoin Yahudis on re' au.

Haan tabes ma haan buseet 'eu nai' Narkisus in nonot-asar sin ok-oke' re' npirsai neun Kristus.

¹² Haan tabes ma haan buseet 'eu bi Trifena ma bi Trifosa. Sin nanaob hit Usi' In meup goe msa'.

Haan tabes ma haan buseet 'eu au partei, bi Persis. Fin in imsa' nmeup ma'tani' neu hit Usi'.

¹³ Haan tabes ma haan buseet 'eu nai' Rufus. Hit Usi' es re' anpiir ma nbetis naan ee.

Haan tabes ma haan buseet 'eu in ainf ee msa'. Fin in re' naan, on re' au ain honi'.[✠]

[†] 16:7 Suur Akinu' uab Yunani re' reko nneis ma manasik anneis antui mnak, Yunia (kaan bifee). Bian antui mnak, Yulia (kaan bifee). Anmurai na'ko abat bo'es am teun, bian antein antui am nak, Yunias (kaan atoni'). Amnaist ein na'ko un-unu', naan aam Andronikus ma ain Yunia naan, fee-mone re' nmepun neun Uisneno on re' aam Akila ma ain Priskila. [✠] 16:13 Nai' Markus 15:21

¹⁴ Haan tabes ma haan buseet 'eu nai' Asinkritus, nai' Flegon, nai' Hermes, nai' Patrobas, ma nai' Hermas, ma aok-bian sin re' natua nok sin.

¹⁵ Haan tabes ma haan buseet 'eu nai' Filologus, bi' Yulia, nai' Olimpás, nai' Nereus ma in fetof, ma atoin asraint ein re' nabuan nok sin.

¹⁶ Karu hi mibua, mseun ma mtoup es nok es ampaek rais matabes ma mmaneek anbi neek akninu' re' pantas neu atoin apirsait ein. Kristus In jemaat' ein abitan ia, ansoun ein haan tabes ma haan buseet neu ki msa'.[☆]

Nai' Paulus anfaineek sin

¹⁷ Aok-bian arki! Au 'toit he hi mpaant om, fin anmui' tuaf he npe'en ma nbatis ki, ma nakreo namouf ki. Saa' re' sin natoon ki naan, anraban saa' re' hai minoni' mrair ki. Onaim kais ammapartein mok atoni' human on re' sin!

¹⁸ Sin ka nmepun fa neun hit Usi' Yesus Kristus. Sin suma nmepun neu sin tuak ein kuuk. Sin nfeef rekon nok tuaf re' ka nahiin fa fe' nak, mee es re' reko, ma mee es re' maufinu. Sin nfeef rekon he nputa-kriun.

¹⁹ Tuaf anbi bare mee-mee jah annenan nrarin am nak, hi mituin piut meu Uisneno In romin. Etun au neek ii nmariin natuin hi on naan. Au 'roim he hi mjair ahinit anmatoom nok rais rekon, ma kais amseor sin nok are' kanan rais maufinu. ²⁰ Uisneno es re' bisa nfee kit mamut, rame' es nok es, ma tainina'. In of es re' nareu' nitu 'naakf ee in kuasa, ma naruru' mnak, hit es re' amnisat. Naan ka 'roo fa goen. Au 'onen ma 'toit he hit Usi' Yesus Kristus naruru' ma nakrira' In nekan arekot neu ki.

²¹ Nai' Timotius re' nmeup nabu-bua nok kau, nsonu' haan tabes ma haan buseet neu ki.

[☆] 16:16 1 Korintus 16:20, 1 Tesalonika 5:26

Nai' Lukius, nai' Yason, ma nai' Sosipater ansonu' haan tabes ma haan buseet amsa'. Sin re' naan, atoin Yahudis on re' au. ☆

22 (Au re' ia, nai' Tertius kau, atui surat re' ia, utuin saa' re' nai' Paulus anreun he au 'tui. Au 'sonu' haan tabes ma haan buseet manekat amsa', fin au re' ia, hit Usi' Iin ja msa'.)

23 Au, nai' Paulus kau, utua 'bi nai' Gayus in umi. Atoin asraint ein biasa nabuan he nakrein nbin in umi. In nsonu' haan tabes ma haan buseet neu ki msa'.

Nai' Erastus, re' bendahara kota, ma hit aok-bian nai' Kuartus, ansoun ein haan tabes ma haan buseet amsa'. ☆

24 [Au 'toit he hit Usi' Yesus Kristus naruru' ma nakrira' In nekan arekot neu ki arki. On re' naan, tua!][‡]

Uisneno naan, ma'tani' nneis

25 Ampures ma mbo'is Uisneno! Fin In nmui' kuasat he na'be'ib ki. In Rais Reko, nak on re' naan, ma au unoni' ma utoon on re' naan amsa', oras au ubeno' ma utoon anmatoom nok Yesus Kristus. Uisneno es anfei natoon kit are' rasin naan ok-oke' re' nmatoom nok Kristus, re' un-unu' te sin ka nahiin sin fa, natuin ma'nifa' fe'. 26 Mes oras ia, rasin re' Uisneno In mafefa kniun' ein un-unu' antui nain sin anbin Suur Akninu', ro mamniit ein een. Uisneno ro ka nmaet fa, In es re' an'ator he tuaf ein na'kon puru ma pah anfuun am nateef bisa nahiin rasi re' unu' te ma'nifa'. Nok ranan naan, sin bisa npirsai Je, ma sin nmoe' natuin In romin. 27 Suma In nmees kuun, Uisneno. Suma In nmees kuun nahiin batuur-batuur are' kanan rasi. Au 'ait siit pures-bo'is 'eu Ne, natuin Yesus Kristus In 'mepun! Tebes, ro namneo, tua!

☆ 16:21 Haef ein sin Reta' 16:1 ☆ 16:23 Haef ein sin Reta' 19:29, 1 Korintus 1:14, 2 Nai' Timotius 4:20 ‡ 16:24 Suur Akninu' uab Yunani re' manasik anneis ma re' reko nneis-neisi, ka ntui fa era' bo' nua mhaa re' ia.

Roma 16:27

64

Roma 16:27

Au surat antuu' ma nheu' on naan, tua.
Saloom,
Au nai' Paulus kau, tua.

Uisneno In Kabin ma Prenat: Rais Manba'an Fe'u nok
Reta' Ahun-hunut

Genesis and the New Testament in the Amarasi language of
Indonesia

Kejadian dan Perjanjian Baru dalam bahasa Amarasi dari

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons
Attribution-No Derivatives license 4.0.

You may share and redistribute this Bible translation or extracts from it in any format,
provided that:

You include the above copyright and source information.

You do not make any derivative works that change any of the actual words or
punctuation of the Scriptures.

Pictures included with Scriptures and other documents on this site are licensed just for
use with those Scriptures and documents. For other uses, please contact the respective
copyright owners.

2016-06-27

PDF generated using Haiola and XeLaTeX on 19 Jul 2019 from source files dated 20 Jul
2017

60603d94-9a14-5831-a729-e3ba7b0ebc25